

來的使臣根底問猛哥帖木兒勾當朝鮮國王好生至誠怎麼不送將來兵部尙書領聖旨到金水橋邊問曰猛哥帖木兒怎麼不來對曰欽差千戶王教化的三月十一日到王京殿下欽蒙勅諭差陪臣郭敬儀其月十九日伴送猛哥帖木兒住處去了臣等四月二十六日離王京去的勾當不知道又問曰猛哥帖木兒那裏住對曰在朝鮮境內豆萬江這邊住又問道路多少對曰距王京二十五六日路聽罷還櫻棚下朝飯後禮部尙書李至剛及趙侍郎錦衣衛官員等傳聖旨問曰猛哥帖木兒怎麼不來太祖皇帝時發去雲南的倭子擄掠的人物上位都送將去了去年姓金的宰相爲地面勾當來奏有徐國王祖墳的上頭將二千人口連地面都與了你把徐朝鮮不同四夷看承上位至誠殿下知道九變孝順一變差了連那九變都無了一箇帖木兒他做怎麼對曰俺殿下怎麼不知道上位全心猛

哥帖木兒的勾當臣等來的日頭近的上頭曾不知道又問曰猛哥帖木兒去的根源有猛哥帖木兒是太祖高皇帝的百姓那徐每的百姓那對曰普天之下莫非王臣那箇不是太祖高皇帝之百姓又問曰王教化的還從徐國土里來那把那一邊回來對曰臣等不知道以此再問對之如前初六日四更於午門外兵部尙書在朝房問曰恁那裏又有一箇宰相來怎麼勾當來對曰來的勾當不知道又問曰爲猛哥帖木兒的勾當來猛哥帖木兒怎麼不來上位卽位之初誥命印章也與了上位好生重徐朝鮮一箇猛哥帖木兒留下做怎麼不送將來與將來的是那不與將來的是那徐心裏如何對曰有聖旨的上頭去年一萬匹牛隻兩三箇月內準備送將來凡事盡心向上若要聖旨著落要呵一箇猛哥帖木兒怎麼不送將來猛哥帖木兒只怕他自家有緣故不來臣等不知道

庚戌○李行來傳宣諭聖旨永樂三年七月十日早朝後禮部尙書李至剛左侍郎楊右侍郎趙給事中一員等到午門外中道上進二使及從官傳聖旨曰你每爲甚麼來對曰計稟人口事來問曰那箇人口事對曰三月十一日欽差千戶王教化的欽賣勅內東開原毛憐地面萬戶猛哥帖木兒敬恭朕命歸心朝廷今差千戶王教化的賣勅勞之道經王之國中可遣一使同行事欽此差陪臣郭敬儀伴送前去所有猛哥帖木兒事因來奏上位知道問曰我不把朝鮮做外邦看承你國王上占親人把聖旨撒在一邊倒把猛哥帖木兒的言語來奏既受你節制猛哥帖木兒是大王子是大對曰國王不知占親的事故欽差王千戶也不會說道占親況猛哥帖木兒住處不是毛憐若是討本人豈無明降一來他是受節制要緊處防禦有功的人王教化的千戶硬去招諭又有他啓來事故不敢不奏一年內

陪臣數來朝若有明降國王怎敢不欽依又問曰去年奏請十處地面人時怎麼無猛哥帖木兒名字對曰去年招諭的文書上不曾有本人的名字止只奏那十處頭目的名字不曾寫那土地人口此人正是蒙准請十處內鏡城地面江裏(裏力)頭住的人又問曰既是上位占親又要重用這箇人呵你來計稟時便同他一處來就分說地面事故怎麼不准你誰和你爭地面來你把本人延留皆是奸詐上位是天量便恕了呵我每禮部家也饒你不過對曰臣等愚蠢不曾啓國王殿下是我等不是又曰你送文書來的人怎麼知道你回去對國王說知便送將他來申時禮部三官到會同館前廳進二使及從官等曰你早間說的話我每上位根前都奏過了上曰猛哥帖木兒曾有文書到我這里他的文書并你說來的話多有不同不干你事你休管他他自來見我當初不問你國王討人經由你的國中過去只

教你差一人伴送去來賀千秋的使臣在此過了節日回你先回去
十一日早朝辭後於午門樓棚下與諸夷使臣受飯時禮部三官來
傳聖旨問曰你便怎麼回辭你休荒怕你國王猛哥帖木兒的言語
奏將來也是對曰臣等別無他事昨日蒙教先回不敢留滯因此辭
回又傳曰天道暄熱勞路教你歇幾日去就教你過了千秋節日去
你心裏如何對曰皆在上意又問昨日傳與你每聖旨你的話都記
得麼將前話一一誦對聽之欣然還入未時禮部使主客司員外郎
寫臂來曰後來的使臣且休去留他過了慶賀與先來的使臣一同
回去二十五日早朝辭後禮部尚書左右侍郎等引奏朝鮮國王差
來奏猛哥帖木兒使臣今日辭回臣禮部家合回與他文字去上曰
奏將來的話不同又無甚麼緊要勾當只這般教他回去

○壬子遣戶曹參議李玄如京師奏曰永樂三年九月十六日陪臣

李行等回自京師傳奉禮部尚書李至剛等官欽傳宣諭聖旨節該
猛哥帖木兒怎麼不送將來却來計稟你來計稟時便同他一處來
就分說地面事情怎麼不准你誰和你爭地面你回去對國王說知
便送他來欽此臣兢惶無措竊照猛哥帖木兒係是小邦地界公嶮
鎮迤南欽蒙准請十處內鏡城地面豆萬江裏頭住的人又未嘗蒙
令臣發遣明降以此差人奏達今據議政府狀啓備東北面都巡問
使呂稱呈報有猛哥帖木兒與欽差千戶王教化的等於本年九月
初三日起程赴京臣尙未委端的慮恐遲延當日即差上護軍曹恰
星夜馳赴萬戶猛哥帖木兒在處催督欽赴朝廷
壬子（甲寅）○遣奉常令楔耐押東寧衛逃軍十口赴遼東
甲寅（戊午）○吉州道都安撫使報其道事宜報曰兀良哈萬戶把
兒遜甫乙吾阿亂千戶其羅美於赤於山不花所仡羅多時古加乙

非等二十餘人會于因居站把兒遜曰此時不入江南則猛哥帖木兒兒(衍力)必受聖旨以予爲管下百姓故不得已入朝還來則如前仰事朝鮮吉州疊入殷實管下千戶者安等十四戶男女并一百餘人節晚失農每戶一二人欲往舊居處捕魚資生以巨陽千戶高時羅古及殷實一族建州衛千戶時家等欲招安者安及仇老甫安骨看兀狄哈與建州衛千戶談波老出來待候故未得入歸捕魚千戶阿乙多不花百戶好時不花等欲上京乞糧故不得已上送好時不花能弓馬且穎悟宜留京侍衛職賞勸後

壬戌○朝廷使臣及建州衛千戶時家到女真地面東北面都巡問使報大明使臣與建州衛千戶時家等以女真萬戶仇老萬戶甫也骨看兀狄哈萬戶豆稱介等招安事是月二十二日到甫也住處而留連其勅諭迎命及處變事問於甫也甫也曰使臣無心中到來不

得已迎命使臣云吾都里兀良哈兼進兀狄哈等頭頭人皆順命唯仇老甫也等不順以招諭以歸事奉聖旨而來仇老甫也等云雖順命妻子百姓等必爲朝鮮所擄慶源兵馬使阻當則不得率行右仇老甫也等王可仁招諭時十處外人物慶源兵馬使阻當不入送如何

五年十月

乙丑(丁卯)○賜兀良哈高里李豆蘭各衣一襲笠靴

○丙戌命司憲府詰問西北面行臺監察許倜罪倜爲西北面檢察別監至義州執彼土興利人吳從吉及窩主崔永奇典刑以聞上怒其已誅而後聞下憲府詰之掌令徐選啓曰許倜擅殺興利人過矣上曰擅殺過矣其罪當殺歟更議以聞徐選啓曰倜殺主人崔永奇則過矣命令倜私馬上京

五年十一月

壬子○解送遼東人曹成等十一名成等到江界將縣布綾段賣買自稱曹指揮親男無文憑故以典農副正元閱生解送之

太宗實錄 卷十一

六年正月

○壬辰朔上率世子百官遙賀帝正坐正殿受朝賀宴羣臣吾都里兀良哈日本客使皆與朝上曰受日本使之朝無乃僭歟且以鄰國之使在於拜列似未便也左右對曰振古如茲賜羣臣宴日本客使皆坐於殿上

○丁酉奏聞使戶曹參議李玄回自京師玄賈禮部咨文而來咨曰永樂三年十二月初四日准朝鮮國咨該陪臣李行等自京師回傳（完脫力）欽奉該猛哥帖木（完脫力）怎麼不送將來你回去國王說的便送他來等項緣由差陪臣李玄賈文移咨施行查得本年七月二十五日早本部官將引差來人李行等於奉天門題奏合無回與他國王文書奉聖

旨著使臣每回去無文書與他的奏詞與猛哥帖木(兒脫力)說的多不同等猛哥帖木(兒脫力)來時自有說話欽此當即李行等面聽聖旨本部又將前因再行傳與各人回還去訖今咨前因查與元奉旨意不同現是陪臣李行等所傳差訛理合移咨本國知會今後一應事務須憑文書爲准又有口傳事理宜字細參詳施行禮部官又謂玄曰汝國在前自云不與日本交通今朝廷使臣回自日本告曰朝鮮使臣先在彼矣又皇帝已招安童猛哥帖木(兒脫力)不因汝國汝知之乎汝國言將令猛哥帖木(兒脫力)入朝此汝國之奸軌也時日本使適入朝朝廷賞賜甚厚且序其班於李玄之上云

丁酉○賜女直萬戶檢校漢城尹崔也吾乃酒十瓶

丁未○命置柳青兀良哈多時昆車等十九人于吾音會東北面察理使啓兀狄哈等來投也

○壬子兀良哈萬戶甫里等詣闕辭賜甫里衣一襲笠靴千戶古里等三人各衣笠命饋於東廂

壬子(乙卯)○吾都里千戶金回大兀良哈千戶金著和等六人來獻正朝土物各賜縣苧布各一匹

己未(二月壬戌朔)○流前軍資監曹士德于春州初判漢城府事李行以計稟使入朝還傳宣諭曰童猛哥帖木(兒脫力)宜發赴京朝議未決既而聞猛哥帖木(兒脫力)已自赴京乃急遣李玄及猛哥帖木(兒脫力)未至徑奏之禮部官曰宣諭之旨本不如此乃以錄本示之移咨本國曰李行誤傳聖旨矣憲府劾問行行曰吾不曉華語惟憑舌人耳其時日錄具在可考也又劾曹士德士德曰與李行面奉宣諭非誤也憲府啓士德誣妄訛傳李行不質諸禮部偏信士德之言乞治其罪上以行憑舌人之言只流士德

○議政府上言請禁入朝使臣買賣從之啓曰金銀不產本國年例別例進獻亦難備辦入朝使臣從行人等不顧大體潛挾金銀且多賣苧麻布又京中商賈潛至鴨綠江說誘護送軍冒名代行至遼東買賣貽笑中國今後使臣行次嚴加考察毋得如前其進獻物色及隨身行李依前定斤數外不得剩數重載如有犯令現露者使臣及西北面都巡問使令憲司痛行料理將犯人籍沒家產身充水軍

六年二月

○乙丑禁西北之民越江買賣議政府啓義州民朱夫介等四人潛將馬匹賣諸境外人事發在逃成州僧海禪歷東北面遂越江深入乞將東北面各戶馬匹考其毛色齒歲籍記烙印如有買賣故失必須告官其無烙印馬及各道無行狀往還者並許人陳告每一匹徵布五十匹給告人充賞馬主照律決罪馬匹沒官無行狀僧人許人

陳告收取所持物色給告人充賞其僧各於本貫船軍充定從之

○己卯兀狄哈金文乃等寇慶源之蘇多老兵馬使朴齡擊却之初野人至慶源塞下市鹽鐵牛馬及大明立建州衛以於虛出爲指揮招諭野人慶源絕不爲市野人憤怒建州人又激之乃入慶源界抄掠齡易之率數十騎赴之野人以騎兵從傍突出齡策馬而退俄而官兵繼至齡孿以戰有一人獻計曰野人善射難與爭鋒若執短兵鏖戰則勝負決矣卽突陣而入衆從之殺文乃子野人乃掠牧馬十四匹而去官軍死者四人

六年三月

〔參〕○乙未東北面都巡問使上其道事宜啓曰慶源境散接軍民並於近城聚居業農其草賊出來要路通望高峯置烽燧謹斥候遇有寇敵兵馬使率領丁壯應變從之

丙申○賀正使姜思德等回自京師通事曹顯啓曰吾都里萬戶童
猛哥帖木(兒脫力)等入朝帝授猛哥帖木(兒脫力)建州衛都指揮使賜印信鍍花金
帶賜其妻幙卓衣服金銀綺帛於虛出參政子金時家奴爲建州衛
指揮使賜鍍花金帶阿古車爲毛憐等處指揮使賜印信鍍花銀帶
阿難把兒遜毛憐等處指揮僉事賜廣銀帶
丁酉○遣上護軍安遇世于東北面使體探吾都里兀良哈事變而
來也

○戊申賜女真檢校漢城尹崔也吾乃護軍童所老衣笠靴又賜所
老妻紬苧麻布各一匹

○己酉朝廷使臣內官鄭昇來以求純潔光妍好細白紙與漫散軍
人未還者也省親內官趙良等六人隨昇以來昇與良等本國火者
也

略下

六年四月

癸酉○遣司譯院通事舍人裴蘊如遼東移咨都司曰議政府狀啓
據右軍摠制張思靖狀告有義州住驅奴吳哲年三十歲昨於洪武
三十四年時分作賊偷盜義州百姓鄭松戶牛隻逃走致被捉獲割
去兩耳又於洪武三十五年三月內偷盜思靖戶衣服馬匹逃走追
蹤得獲刺面常川不服使喚逆奴自知罪惡又於永樂三年七月內
帶引伊妻栗伊逃走不知去向間本年十二月二十一日司譯院副
使康邦祐回自京師對思靖說稱上項逃奴吳哲將引伊妻並不識
姓名男子共三名逃往遼東地面蒙都司捉解京師道經鞍山站迎
見聽此告乞行移施行得此狀啓據此切詳上項逃奴吳哲既在本
國累曾作賊已經刺面割耳今來帶領從伴逃往上國慮恐本性難
改仍前作觥深爲不便煩爲轉達解發本國前來幸甚

戊寅○命禁僧人越江興利者西北面都巡問使啓道內閑雜僧徒營構草幕賣持願文數多聚會收蓄人參及冰凍之時或有越江入歸者或招引彼土人回還隱接者乞江界泥城義州宣州以北草幕並令破取堅禁僧人依止上許之但勿毀草幕

○己卯朝廷內使黃儼楊寧韓帖木兒尙寶司尙寶奇原等至結山棚讎禮上以時服率百官出盤松亭陳百戲迎至景福宮勅曰朕重惟先皇考皇妣恩德欲舉薦揚之典特遣司禮監大監黃儼等往爾國及耽羅求銅佛像數座尙相成之以副朕意儼等又賈禮部咨來一件承准左軍都督府照會該保定侯孟善咨革除年間漫散土人除欽差千戶王得名等往朝鮮招回復業外有全者遂等四千九百四十口仍在本國豐海等道藏住續該本國將金奉等一十九名回還外其餘不見送到又有土官千戶高勗等下家小海西等十四名

逃往朝鮮照會到部合咨本國催聚煩爲作急發來復業施行一件該建州衛指揮猛哥帖木兒奏有親屬完者等一十一名并家小見在朝鮮本部奉聖旨恁禮部行文書與國王知道給與他完聚略下

辛巳○兀良哈萬戶甫里使其弟古里來朝
六年五月

丁酉○賜兀良哈萬戶甫里起花銀帶一腰青緜布黑麻白苧布廣紅綃各一匹古里銀帶一腰黑麻布白苧布各一匹通事金仁奇草帽子一青綿布黑麻布各一匹

己亥辛丑○命置貿易所於鏡城慶源東北面都巡問使朴信上言鏡城慶源地面不禁出入則或有闌出之患一於禁絕則野人不得鹽鐵或生邊隙乞於二郡置貿易所令彼人得來互市從之唯鐵則只通水鐵

壬子○東北面都巡問使朴信執僧海禪送于京禪托遊方潛入上國回至慶源府境信遣人誘致以送下巡禁司同臺諫刑曹鞫之初譯者康邦祐如京師還至復州見遼東千戶金聲言本國僧海禪戒月者來矣至半途邦祐遇一僧料其爲海禪也作華語曰汝非朝鮮僧海禪乎因作鄉語給之曰我東寧衛百戶也凡居是衛者皆朝鮮人也聞汝來豈無鄉曲之意乎禪曰山僧亦聞如是也邦祐因問族親所居與入來意禪曰吾叔父金光秀者居留後司十水川里山僧本住天磨山曩以事至咸州見僧戒月者言中國風土甚樂思欲一見而來也邦祐還告于朝執光秀詰之曰吾有姪僧然未知其所往也其親父在西北面乃捕其父其後奏聞使李玄至大明見鄭昇昇曰聞有太上王塔今在咸州果是誰乎玄曰無有昇笑而不復言玄回至遼東有千戶姓王者亦以是問之玄還以告人多疑上黨君李

佇使禪走泄以問禪父荅曰吾子嘗爲上黨君營佛寺矣判巡禁司事朴錫命等皆以爲辭連上黨君不可不究問上曰佇雖廢豈至爲此然若不明訊人言未已宜問佇之僕從因謂左右曰我終不令此事同於尹彝李初之亂巡禁司詰諸僕從皆曰吾主專盛之時嘗爲小郎營一寺放廢之後未嘗復見此僧後鄭昇來上問以玄所聞昇屏左右言之自是待佇益厚及禪來訊之辭不及佇

六年六月

己未朔(壬戌)○吾都里童所乙吾李好心波童於虛主等七人來○賜童所乙吾等七人青縣布紅紬布黑麻布白苧布各一匹於虛主之子於乙於伊黑麻布一匹○癸未遣敬差官上護軍車指南于東北面以李好心波等還押送也

太宗實錄 卷十一

六年七月

癸巳（丙申）○遣司譯院副使崔雲押蘇州衛右所百戶施得摠旗林七郎等如遼東得等乘駕海船運糧北京遭風漂到葦城船毀上岸遣通事前判軍器監事郭海龍前去體問因與偕來上御廣延樓引見施得等謂之曰困阨備極而保全性命者帝德也得等叩頭曰我輩至殿下境土而得生乃殿下之德也命賜得等八十四人衣服笠靴且饋于西廂而遣之

己酉○遣上護軍車指南管送猛哥帖木兒親屬完者等十名并家小子建州衛

○遣司譯院判官張若壽押浙江觀海衛百戶楊茂等如遼東楊茂

率軍人四十八名徒步至義州自言乘駕海船到大倉裝糧隨同摠兵官平江伯率領糧船一千三百隻欲往北京交卸忽遭風颶飄到海邊船破上岸飢餓到此兵馬使鄭耕以聞命厚加慰勞給鋪馬脚力以送之

六年閏七月

丙子○遣司譯院判官姜庾卿如遼東浙江金鄉衛前千戶所總旗黃進保等五十五名根隨總兵官平江伯海運糧儲欲往北京遭風飄過東海至東北面吉州遣庾卿以押送

六年八月

庚寅○朝廷遣還西北面孟州人金遂初遂因牽易換牛隻至遼東托疾留連都司以無號牌執送京城帝宥而還之

○甲午賜吾都里前護軍崔仇帖木兒衣服靴笠紙一百卷以告歸

本土也

癸卯○遣司譯院直長金有珍押送浙江紹興衛三江千戶所摠旗吳進等于遼東初進等運糧發大倉向北京在海逢倭寇官軍死者三十五名進等二十五名結筏漂泊兆陽鎮官給衣糧遣有珍押送之且咨都司曰今差張洪壽管押逃軍約於九月初一日過鴨綠江慮恐逃軍不改原心中途復行逃竄深爲未便煩爲差發軍兵前來中路應接

○遣知司譯院事張洪壽管押漫散軍人赴遼東都司交割咨禮部曰近承准來咨該爲在逃人口事承准左軍都督府照會據遼東都司呈備東寧衛百戶邊林弟邊連告有餘丁邊都里哥及軍人黃顯等告有妻甥黃不改并土官千戶高昂下家人海西等節次逃往朝鮮國藏住又革除年間原逃漫散土人除欽差千戶王得名等往朝

鮮國招回復業外有全者遂等四千九百四十九名仍在本國豐海等道藏住續該本國解送金奉等一十九名回還外其餘不見送到再行移咨煩爲作急發來准此行據議政府狀啓敬奉判付卽差判內贍寺事閱若孫徧往豐海等道西北面江界泥城沿江口子幽僻山谷間窮搜揆究並無上項邊都里哥黃不改海西等姓名軍丁逃來潛住當備差官閱若孫及西北面都巡問使趙璞豐海道都觀察使申浩等呈俱各行移檄管府州郡縣及沿江口子根尋獲到壬午年間一同林泉逃來宋德玄全小金等男婦共四百一十九名就問得各人供稱同來李賣土等六十九名因病身故所供是實具呈照驗得此狀啓施行據此照得先經陸續差知司譯院事張洪壽大護軍梅原諸司譯院副使張有信等管押節次獲到漫散軍人張甫金禾等男女共四百四十三名解赴遼東都司交割去後今奉前因除

病故外將見獲宋德玄全小金等男女共四百一十九名責差陪臣張洪壽管押解送遼東都司交割

〔參〕庚戌○吉昌君權近上書書曰〔中略〕天子以雅樂賜諸侯誠稀世之異寵也帝以異寵加於殿下宜卽用之親行告廟之禮今乃不然遽辭爵命其於帝意以爲如何臣聞近日使臣黃儼每語人云殿下事大之誠則如舊矣執政大臣奉行不謹必以此言聞于帝聰繼有遜位之報則帝心益以儼言爲然是必權臣執國命擅自廢立欲挾幼主以抗中國有如崔瑩之爲者矣雖不遽興問罪之師必召執政以詰其由執政能如鄭道傳之拒命不往乎然則釁隙由此而成矣不能不往則殿下使同盟元勳盡心憂國者一朝以無罪陷之不測之淵而莫之救也執政既往嚴刑詰問織成其罪則豈止其身受戮而已乎必將以此成我罪名以興問罪之師矣兵法有曰將欲取之必姑與之帝以雅樂賜之殿下安知其意不在於此乎殿下徒以盡忠事大之誠而恃帝之眷遇然帝於東隅置建州衛是扼我咽

喉掣我右臂也外立雄藩以誘我人民內加異寵以懈我禦侮其意固難測也殿下旋旋不以爲意欲行揖讓以委幼弱舉國臣民罔不痛心〔下略〕

六年九月

丁巳朔〔己未〕○朝廷差來王伐應只招安骨乙看兀狄哈萬戶豆稱介父子及副萬戶阿知千戶達賓介等二十五名赴京師東北面都巡問使所啓也

六年十二月

〔參〕○甲午賜鄉右軍同知摠制李玄林州玄上言臣曾祖大都路摠管伯顏至元丙戌之歲奉皇舅齊國大長公主而來子孫相繼世受國恩至今尙未得於本國付籍乞依他向國人例賜鄉從之

丁未○東寧衛千戶金聲百戶李賓賈禮部咨偕來咨曰永樂四年十月初八日禮科抄出遼東都司東寧衛千戶金聲奏永樂三年十

二月內賈擎勅諭往東良等處地面招諭經過朝鮮國後門地名海
通過有本衛原堞土軍小旗劉山城等告稱洪武三十五年漫散逃
來本國豐海道等處住坐欲歸原衛復業不得回還具告今思各人
原係五丁堞集土軍如蒙行移取回著役屯種便益將見在朝鮮軍
餘家小全者遂等四千九百四十九口開坐具本該兵科官賈於右
順門奏合著該衙門知道奉聖旨是欽此除欽遵外案照先承左軍
都督府照會據遼東都司備東寧衛呈開百戶邊林弟邊連告有餘
丁邊都里哥等逃在朝鮮國葛開萬戶府住坐及軍人黃顯等各告
有父母叔弟妻甥黃不改等逃在本國張判事家又有土人全者遂
等四千九百四十口并千戶高勗等下家人海西等一十四口俱各
逃移本國藏躲告乞取回復業本部累經行移本國取發回准本國
咨稱除行東西北面沿江把截官司及各道府州郡縣分投挨究得

獲解送遼東都司外回咨到部行間欽奉前因理合再行差人催取
除具奏外今差千戶金聲等賈文移咨本國煩爲照依邊連等所告
處所作急差人遍行所屬守併務要根捕前項在逃人口得獲解發
遼東都司交割仍希解過人名口數回報施行上拜勅受賜訖與帖
木兒及聲等行私禮仍設宴初以帝所賜帽珠繫于笠以出酒數行
卽脫笠著紗帽以終宴

太宗實錄 卷十三

七年正月

〔參〕庚午○宴金聲李賓于廣延樓下

〔參〕甲戌○領議政府事成石璘上書陳時務二十條命下議政府議得書曰
國家之事勢而已觀其勢而預爲之備可得無患雖有智者常不能善於
其後臣素無知見年又衰邁敢以愚者一得之慮仰瀆聰聽古有杞人憂
天者老臣之見實相表裏伏望聖慈赦其迷妄後必有以千里馬獻者臣
之所陳皆淺淺事目豈足達於香案之前萬有一可取者伏望明主斷而
行之凡有國有家者不可無備一家則爲家長者躬率力行乃有成效今
茲足食足兵是爲一國有備之具恭惟殿下宵旰軫念下令中外盡掃一
切不急之費務令家給人足與民休息略中一西北面平壤爲根柢其都巡
問使與府尹須要得人器械糧餉皆可取足臣曾兼尹茲府其營內弓矢

刀槍無一可用者臣問其故只在前人不爲用心耳臣悉罷不急工作專
務軍器僅備各色若干數糧餉亦如之其土官千戶之設平時則實有弊
也及當有事危急之際恐彼守令之兼任者不得用其力也政府議得右
條一依已曾行移施行何如一安州義州泥城江界等處亦遣才堪帥衆
知機進退者修城堡蓄糧餉備器械鍊人馬使恩威並行人知愛畏然後
可得而使也若臨時差遣將不知人人不知將則及其臨危何以相濟宜
速差遣責以三年何待臨渴一東北面永興咸定州青端州慶源鏡城等
處亦依西北面例其深處要衝之地修築一城遣一大將以守之不可虛
弱雖當無事之時亦不可罷一各道界首官須擇官高其才可兼軍民者
差遣必滿三年政府議得右三條雖已曾行移之事今亦更當行移施行
何如略中命一依議政府議得內施行

○辛巳欽差官東寧衛千戶陳敬賈禮部咨二道來上迎入正殿敬
授上咨文一件催取革除年間漫散到來仍在本國東寧衛軍人全

者遂等四千四百九十一名及邊都里哥事又據建州衛女真萬戶
佟鎖魯阿告撤取本國金線地面住坐家小六十四口給發建州衛
完住事一件建州千戶失加奏稱察罕失刺不花等十三戶解發完
住事上覽訖敬曰皇帝宣諭懷土常情親戚不可相離上伏地叩頭
遂設宴慰之

〔參〕○壬午上如大平館宴陳敬

七年二月

〔參〕○甲午宴金聲陳敬李賓于廣延樓下

○丁未欽差官金聲如義州點送推刷漫散軍也

七年三月

己巳○禮曹參議安魯生回自京師賈禮部咨文來咨曰該兵部於
兵科抄出建州衛指揮莽哥不花奏洪武十九年間有本處楊哈刺

赴京蒙除三萬衛百戶職事洪武二十一年間根指揮侯史家奴等
於斡朶里開設衙門後因三萬衛復回開原立衛起發人民之時有
百戶楊哈刺等將帶家小於土門地面一向寄住洪武三十三年間
有朝鮮國萬戶鎖矣交納等前來起取本官連家小三十戶在本國
後門阿漢地面住坐具奏取回兵部參看得楊哈刺既係原除三萬
衛百戶合取回還本衛住坐永樂四年十二月十二日早兵部官於
奉天門覆奏奉聖旨是欽此行移到部照得朝鮮國見有使臣安魯
生在京合寫咨文就付使臣賈往本國取發前項人口回還三萬衛
住坐仍希發過人名口數回咨施行
癸酉〔乙亥〕○解送漫散軍劉山城等二千名于遼東遣上護軍金
文發李推大護軍姜元吉管領分運以送

七年四月

〔參〕○辛丑欽差官陳敬李賓至昌德宮先行聖節賀禮上冕服率羣臣行賀禮仍宴敬等於廣延樓

○癸卯遼東百戶李賓還

癸卯○遣判漢城府事契眉壽如京師賀醴泉甘露等禎祥仍計稟漫散軍事也咨禮部曰據議政府狀啓備西北面都巡問使呂稱呈有宣州鄉吏金難等二十六口平壤府官奴內隱白等一十三口先因避役逃往遼東地面住居近於革除年間回還本國各復舊役今蒙起取具呈照驗得此又據前左軍摠制金漢老等狀告有父祖傳來驅奴林延親父林松等三十二口昨於洪武二十年三月逃往遼東冒充軍役後於洪武三十五年有林延等逃還本國漢老等各執使喚今蒙起取告乞詳狀施行得此狀啓據此看得鄉吏金難公私驅奴內隱白林延等雖稱鄉吏公私驅奴不敢擅便拘留理宜咨稟

聽候明降施行又咨曰承准來咨起取修鎖魯阿家小事於東北面鏡城地面究問得女真萬戶修鎖魯阿等六戶家小男婦共五十七口內除修鎖魯阿子三甫等一十四口於永樂四年八月間先送建州衛外今將見在六戶四十三口送建州衛完聚去訖

壬子〔五月甲寅朔〕○遣左軍同知摠制盧開如京師賀千秋也咨禮部曰承准來咨起取三萬衛百戶楊哈刺等家小事准此行據議政府狀啓據東北面都巡問使朴信呈備鏡城等處萬戶崔咬納狀供原係玄城付籍人氏（民力）洪武五年兀狄哈達乙麻赤到來玄城地面劫掠殺害當有管下楊哈刺等被兀狄哈擄掠前去咬納將引原管人戶二十戶前來本國吉州阿罕地面住坐小心謹慎防倭有功敬承國王委付鏡城等處萬戶職事後於洪武二十三年親往兀狄哈地面尋覓得楊哈刺等九戶到來阿罕同住當差今蒙朝廷起取供

乞施行得此具呈照驗得此狀啓據此看詳楊哈刺等九戶見於吉州阿罕地面男婚女嫁安業居生參照來咨內萬戶鎖矣咬納起取楊哈刺連家小三十戶在本國阿罕地面住坐今據崔咬納狀供洪武二十三年到兀狄哈地面尋覓得楊哈刺等九戶到來事意蓋與來咨內戶數不同又欽檢到聖朝戶律內一欵逃避差役其在洪武七年十月已前流移他郡曾經付籍當差者勿論欽此理合咨稟聽候明降鎖矣咬納（候力）即崔咬納也

七年五月

〔參〕○戊午宴鄭昇馮謹陳敬于廣（延力）迎樓金角等與焉

〔參〕○庚申上如太平館宴鄭昇馮謹陳敬金角等

〔參〕○壬申上如大平館宴黃儼奇原陳敬亦與焉（下略）

〔參〕甲戌○千戶陳敬詣德壽宮還入成均館謁文廟

丁丑○遣判典農寺事李湘管押漫散軍丁祿吉等七百四十六名赴遼東

七年六月

丙戌（戊子）○遣通事朴茂管送廣洋衛百戶吳敏于遼東敏率旗軍一百十五名乘駕海船運糧北京遭風漂到豐海道豐州故給衣糧遣茂押送之

○遣上護軍朴矩管押漫散軍金必果等八百三十一名赴遼東

〔參〕○庚寅（中略）初黃儼之奉誥命而來也大臣等啓曰儼寵宦也若因儼以請於帝使世子尙帝女則我國之幸也上頗然之於是潛達意於儼儼曰何幸何幸及儼之再來無一語及之上悔之已爲世子定婚於前摠制金漢老之家至是儼又來上使李玄傳言曰皇帝待臣甚厚臣欲親朝但不敢委國事而行也世子年已稍長且已娶欲令代臣朝見儼曰甚善孔俯聞

之密謂玄曰世子今將朝見若先行吉禮似爲未便今帝女之未嫁者二三儻得連姻帝室雖北有建州之逼西有王狗兒之戍何足畏哉玄然之二人遂俱抵驪興府院君閔霽第陳其策霽曰是非吾所知也俯退與趙璞安魯生議二人皆以爲然下略

癸卯○遣司譯院判官林密如遼東咨曰謹見世子進賀正朝擬於九月初頭起程欲要經由陸路前去煩爲轉達朝廷許令北京往來
○甲辰欽差千戶金聲還自義州

太宗實錄 卷十四

七年七月

○癸丑陳敬金聲等還命左代言尹思修與議政府餞之

〔參〕壬戌○賜弓矢甲冑于東北面都巡問使李稷稷將行詣闕辭有是賜蓋懼王狗兒之逼以備不虞且欲城于北方也

七年八月

己丑〔辛卯〕○遣大護軍曹渾管押漫散軍李白吉等五百四十九名如遼東

○辛卯西北面行臺監察李有喜復命有喜啓黃太監迎逢遼東軍人散入義州村落易換牛馬或有抑賣者前都巡問使呂稱義州牧使辛有定等不能禁抑命司憲府推劾以聞乃流稱于咸陽有定于

漆原現任守令決筮還任已曾屬散者自願付處
壬辰（乙未）○遣戶曹參議具宗之如京師咨禮部曰永樂四年十
二月欽差千戶金聲等到國承准來咨催取在逃人口事准此判付
議政府卽差上護軍申商朴仁幹等遍行豐海道及東西北面江界
泥城甲州等處挨究緝捕去後永樂五年正月欽差千戶陳敬到國
又准來咨亦爲此事承此就行議政府再差宗簿副令權璵於上項
等道催併緝捕間回據申商等呈承差於各道江界泥城幽僻等處
尋蹤緝捕除崔時明金大難等三百六十三口病故外見獲到各處
改變姓名藏躲漫散軍餘劉山成等男婦家小人口就行各官收禁
聽候外具呈照驗得此狀啓據此照得上項漫散軍餘原係小邦有
役人民曩因胡拔都高鐵頭等到來鴨綠江邊裏虜前去遼陽地面
居住後充東寧衛軍丁亦有爲事逃往自充軍役者近於革除年間

逃還本國幽僻山谷間藏躲永樂元年正月內有欽差千戶王得名
欽賈勅諭東寧衛漫散官員軍民人等到來開讀當卽欽依緝捕除
事故四百九十六名外將見獲到林泉等并家小一萬九百二十名
差陪臣黃居正一同欽差官解送遼東都司交割去後本年節續捕
獲到張甫金禾金永等并家小四百四十三口差陪臣梅原渚張洪
壽張有信三次解送遼東都司交割又於永樂四年八月內除李賣
土等六十九口事故外將續獲到全小金等連家小四百四十五口
差陪臣張洪壽管押解送遼東都司收領了訖今奉前因通前因通
前事故九百二十八口除將鄉吏金難等公私驅奴林延內隱白等
七十一口另行計稟外今將見獲漫散軍餘劉山成等來咨內付黃
不改邊都里哥等并家小男婦并四千一百二十六口分作六運差
金文發李推姜原吉李湘朴矩曹渾等管押解送遼東都司交割了

當其有未獲人數尙亦差人分投緝捕如遇得獲隨即另行解送參照上項軍丁始初漫散之時豈無事故及往他方者如蒙奏達伏望聖慈垂恩小邦幸甚

〔參〕○丁酉以金承澤爲東北面兵馬都節制使兼永興府尹安魯生開城留後司副留後兼京畿都觀察使朴矩義州牧使時東北面都巡問使李稷兼永興府尹至是乃以承澤兼之專掌軍事以備王狗兒之逼稷巡行道內兼治軍民之事副留後與京畿觀察使本不相兼以留後司凋殘使觀察使兼之以便使臣供億也

○庚子宴韓帖木兒于廣延樓上謂帖木兒曰黃大人與王狗兒大人秩孰爲高對曰等爾上曰然則王大人何爲尊敬黃大人乎對曰作假子故也上曰王大人何以來野人地面對曰勒兵巡塞徼且試田獵也

○庚戌計稟使書狀官鄭穉來上迎問曰禮部有何言對曰禮部曰金聲先聞于帝曰漫散軍民內托以官私之賤而誣之者多矣上又問皇帝待若等何如對曰待以厚臣眉壽之侍宴於帝者三又別有賞賜令禮部郎中及宦官數人引臣等遍觀佛宇館舍之奇勝每於奇觀設宴以饋又帝御西角門命眉壽曰爾國產馬之地歸報爾王良馬三千匹汝可將來朕以戶部布絹送于遼東當酬其直〔下略〕

七年九月

〔參〕壬子○西北面都巡問使李龜鐵啓道內事宜從之啓曰煙戶軍丁元數戶首奉足并五萬四千八百三十七名內除甲士儒戶鄉站戶船軍外侍衛四十牌戶主奉足并九千二百六十三名翼軍十四翼戶首奉足并二萬三千十二名臣觀各牌各翼軍人立役形止侍衛軍奉足三四名式定給以四十牌每一朔二牌式至於二年一度上京一朔侍衛其各翼以十

四翼朝廷使臣及每朔往返本朝使臣遼東至護送迎逢輪次來往人馬俱困失農以故各牌各翼軍馬勞佚不均憤怨非無乞依前例各翼不動以弓馬有實人束定千戶百戶其中以清廉壯勇者擇定每三翼團練使一員差下翼中凡事考察令千戶率領周而復始上京侍衛及遼東迎逢輪次定體以均勞逸以副民心略下

丁巳○賀千秋使盧閑等還至義州馳報曰帝許世子朝見命臣等曰汝世子不可涉海可由北平府路來汝等之還亦由此路先視道路險易歸報國王帝又命摠兵官王狗兒春山二人自遼東護世子赴京仍監視路次供億又勅遼東都司朝見之行如有未備事件應辦護送上聞之喜甚左政丞成石璘等詣闕賀閑至京師詣禮部呈楊哈刺咨又數日有兵部武選清吏司郎中謂閑曰你賣來的楊哈刺咨文事該建州衛奏洪武三十三年時分那人每往你那地面去

了你那里却開道洪武二十三年這人每却是俺大國的人俺堂上大人禮部大人都說你國家至誠革除年間逃過去的人也送過來了這些人有甚麼打緊又道你那國家錯行移這咨太祖上位當初立下的戶律內一欸勾當不是這意思遼東的人走在浙江浙江的人走在山東就在那里附籍當差不是說走在外國去的不問○庚申楔眉壽賈禮部咨回自京師咨曰一件在逃人口事准兵部咨兵科抄出遼東東寧衛千戶金聲奏差往朝鮮國取原漫散軍餘家屬全者遂等四千九百四十九口永樂四年十二月初二日到本國義州萬戶府有旗軍李不來等告有同來劉山城等并家屬在豐海等道住坐著落本國取到劉山城等一千七百八十六口及原帶鐵嶺等衛北京永平等府男婦二百一十四口分作三運差撥官軍管送遼東都司交割又據旗軍李不來等四十三名供出一千四百

口在於江界等道住坐不曾發送除分投行取未到見有旗軍劉思京伊等二百一十口停於鴨綠江住歇本國將各人捏作洪武三十年以前到來鄉戶官私奴僕名色各處州郡亦有此等人口俱各收監稱言差人具奏著令聽候不與起發今照各人俱係洪武年間五丁塚一籍定人數除見解遼東都司一千七百八十六口先此本國差通事張洪壽送過內有見在三百一十七口病故一十二口外有二千八百二十九口尙未點發誠恐一槩捏稱遠年鄉戶奴僕等項名色做做具奏抄呈到部行間又准本國咨亦爲此事參照前項人口係是洪武年間五丁原塚土軍應合取回人數合行本國照依原行事理起取施行永樂五年七月十四日早兵部具奏欽依是著禮部行文書去除欽遵外備咨到部合行本國欽遵照依原行事理將未獲人口取發遼東都司交割仍希發過人名口數回報施行一

件馬匹事准兵部咨開永樂五年七月十五日早該朝鮮國使臣楔眉壽於西角門欽奉聖旨恁國裏是出馬的去處如今朝廷要些馬用恁回去說與國王知道換馬三千匹你就送將來價錢著戶部家運將布絹去遼東還恁欽此除欽遵外移文到部合咨本國欽遵施行

〔參〕○乙亥遣世子〔禮九〕禔如京師賀正也〔中〕遣清平君李伯剛參知議政府事朴信僉內侍府事金琬護送至遼東〔下〕略

丁丑〔已卯〕○東北面都巡問使李稷啓禁青州以北無公引人物往來從之啓曰青州以北各官人物及吾音會建州衛人物因無考課逃亡移徙互相往來或爲窺覘或傳誣妄之言無賴之徒及犯罪逃走人等造言生隙今後青州以北入歸者京來人則京中衙門外方則各其所居官印信明文受出方許來往又令各處興利人毋得

入磨天嶺以北著爲禁令

○遣上護軍張大有管押易換初運馬二百匹如遼東

七年十月

〔參〕○己丑平壤府尹尹穆上便宜事目八條下政府擬議一關譏而不征所以察異服異言禁人出入察敵間諜況西北一方境連異域尤不可不慮願自今若平壤大同江安州清川江義州鳴綠江等處定剛明正直者爲別差嚴立課程全任考察俾之流亡自戢邊警自息如有擅自移徙者逃驅避役冒罪偷生者異言不類者俱執傳告所在官司繩之以法委任關吏不如法者從重糾理政府議得大同江清川江鳴綠江已曾把截嚴加考察使無虛疎〔中略〕上皆從政府擬議

壬辰〔乙未〕○遣軍資監權繼管押易換二運馬三百匹如遼東

丙申○世子〔提力〕禔至遼東摠兵官保定侯孟善都指揮使高得內官王

彥金春山等遣人郊迓館待設宴皆極其厚留四日而行曾有聖旨諭遼東都司曰朝鮮國王遣世子來朝世子未嘗出遠涉履良艱如至遼東宜加意慰勞卽選的當官員伴送遵陸來京庶免經由海道歷涉風波儻脚力未敷可撥應付仍移文沿途官司預辦供具務要完備從者亦須待之得宜由是都司差鎮撫陳景千戶陳敏百戶李忠護送所至館驛供帳極備

戊戌○遣大護軍李愨管押易換三運馬三百匹如遼東

○庚子司憲府請罷校書校理李簡職不允簡嘗知龍州事時遼東軍散入境內私易牛馬不能禁約遙任赴都憲司請罪上曰可依見任守令之例決答五十復職

七年十一月

〔參〕○乙卯清平君李伯剛參知議政府事朴信等自遼東還

戊辰○誅龍州人明伊及義州百戶金龍明伊率其母及妻子五口至義州賂龍以麻布一匹求潛渡鴨綠江龍率至江邊刈蘆爲桴以渡之明伊至婆婆府爲徼者所獲刑曹啓准律謀背本國潛從他國但共謀者不分首從皆斬從之

七年十二月

〔參〕丁亥○〔上略〕以辛有定爲慶源都兵馬使鄭耕安州道兵馬都節制使〔下略〕

太宗實錄 卷十五

八年二月

○癸未遣司譯院副使李子瑛管押易換四運馬四百三十四匹如遼東

○丙戌欽差千戶陳敬百戶李賓等齋禮部咨來咨曰今將各件事理書填咨文付陳敬賈奉前去理合移咨朝鮮國知會照依開去事件作急完報施行一件書籍等事欽賜本國王大明孝慈高皇后傳書五十本并永樂六年大統曆日一百本黃綾面一本除交付本國差來使臣戶曹參議具宗之領去外合行知會領受施行一件起取人民事准兵部咨先該建州衛指揮莽哥不花奏有三萬衛百戶楊哈刺洪武十九年將帶家小於土門地面寄住三十三年朝鮮國萬

戶鎖咬納等將本官連家小三十戶起在阿罕地面住坐等詞具奏已行朝鮮國取發今本國王咨據鏡城等處萬戶崔咬納供楊哈刺等原係玄城附籍人氏先被兀狄哈擄去洪武二十三年尋來阿罕地面同住當差安業居生等因回咨參照楊哈刺等原係三萬衛人數難以准理合行取發遼東都司三萬衛住坐具奏欽依既是民不失業軍不失伍准他還行文書與國王知道除欽遵外合行知會一件在逃人口事准兵部咨該遼東東寧衛千戶金聲等奏往朝鮮國取漫散軍餘家小除取發外有一千一百餘口俱係洪武年間五丁掣一充軍籍定人數本國却作遠年鄉戶官私奴僕等項不發等因具奏永樂五年十一月初一日早本部官於西角門欽奉聖旨朝鮮國王將流移人口成萬家發回遼東復役著業了其餘遺下的怎肯占恡不發金聲在那裏貪財好酒奸騙人家子女好生不才他不使

朝鮮國王知道密地裏將這些人都賣放了便將金聲那厮拿送法司問罪再著陳敬鋪馬裏賣(裏力)文書說與國王即將金聲賣放的人口盡數送回遼東復役著業欽此移咨到部合行本國欽遵施行仍將發還人口數目回報計取東寧衛千戶金聲原取未完人口一千一百二十三口本國担(担)作遠年鄉戶官私奴僕等項收監聽候四百七十三口挨究未完六百五十口千戶陳敬原取未完百姓都乙麻等六口

〔參〕丁亥—己丑○上如太平館宴欽差陳敬等

○己丑以大護軍李愨爲東北面敬差官漢城少尹李睽內瞻少尹韓有紋爲西北面敬差官宗簿令李灌爲忠清道敬差官推刷漫散軍之未現者也陳敬率來力士各一人隨之

○壬辰遣知司譯院事康邦祐管押五運馬三百一十四匹如遼東

○己亥鏡城兵馬使遣通事張天祐如野人地面體探事變千戶波加者遇諸要路射殺之

己亥○遣司宰少監任君禮管押六運馬三百匹如遼東

○辛丑遣鐵城君李原迎世子于遼東

癸卯○遣司譯院判官吳義管押七運馬四百匹如遼東

○乙巳遣司譯院判官朴茂管押八運馬四百匹如遼東

○丙午東北面察理使金承暉進建州衛指揮於虛出等所贈綺絹等物於虛出段子藍絹各一匹童猛哥帖木兒段子黃絹各一匹千戶於虛里鹿皮一領千戶夫乙居愁海獺皮一領毛憐衛指揮甫乙好大鹿皮一領察理使上言此皆贈送於臣臣不敢私受謹一一封進命下有司

己酉○遣司譯院判官姜庾卿管押九運馬三百六十四匹如遼東

八年三月

〔參〕○丙辰宴欽差官陳敬李賓于廣延樓下

戊午○刑曹啓曰經濟六典越境興利者勿論錢物多少爲首者典

刑今韓仲老張浩等於進獻紙櫃（櫃力）內以國禁布物隱密挾藏行臺監

察當雜物搜探欲并開進獻櫃子二人答以議政府結裏御印著封

使不得開及至奉天門紙地進獻之際布物乃見貽笑中國乞依六

典論罪（下略）

〔參〕○庚申陳敬李賓觀放鷹于西郊遣右代言李承幹賣宣醞候于迎曙驛

先是敬等出館門偶見漢山府院君趙英茂家人持鷹子而過者遂奪之

是日出郊試之

〔參〕庚午○陳敬等放鷹于西郊議政府迎候于盤松亭設享

〔參〕○甲戌上以鞍馬弓袋箭筒遺陳敬李賓

八年四月

〔參〕庚辰○帝使禮部尙書趙玃賜世子金二錠銀十錠紵絲五十四線羅五十四匹〔中略〕世子詣闕謝恩帝召世子就陛前問曰爾明日發行乎對曰然但禮部以無前例不給長行馬五十四匹草料帝命禮部兵部曰各差人伴送朕亦差內官送遼東矣命世子曰爾於中路先報本國使之迎于遼東世子叩頭而下〔下略〕

〔參〕○禮部尙書鄭賜及黃儼韓帖木兒奇原餞世子于江東驛世子涕泣彷徨鄭尙書曰朝鮮事大之誠已曾知之也幸永永不忘欽差內官郭敬兵部差行人王用伴行世子及宰相以下正官三十五員有廩給打角夫以下至從人七十八名給口糧宰相五人給鋪馬書狀官以下四十人給驢任載車三十六兩遼東鎮撫陳景千〔戶脫力〕陳敏百戶李忠亦伴行

乙酉○欽差官陳敬李賓發向西北面西北面都巡問使馳報天使黃儼於三月十九日渡鴨綠江二人聞之欲迎見儼於路次也

〔參〕○甲午朝廷內史黃儼田嘉禾海壽韓帖木兒尙寶司尙寶奇原等來〔中略〕

使臣至景福宮宣勅書勅曰勅朝鮮國王李諱所取馬三千匹已陸續送到今賜王花銀四十箇每箇重二十五兩計一千兩紵絲五十四匹素線羅五十四匹熟絹一百匹〔下略〕

〔參〕○丙申上如大平館宴使臣陳敬與焉李賓聞父喪不出〔下略〕

〔參〕○庚子贈黃儼田嘉禾海壽鞍馬以靜妃意也〔中略〕上御廣延樓設宴韓帖木兒奇原陳敬與焉

〔參〕○癸卯黃儼田嘉禾海壽奇原及陳敬請遊金剛山命世子餞于興仁門〔外略〕

甲辰〔丙午〕○遣軍資監曹士德管押東寧衛漫散軍劉思京等七百八十一名如遼東

八年五月

○己未遣司譯院直長金有珍管押漫散軍李隆等男婦共一百五十九口如遼東

〔參〕戊辰○黃儼遣陳敬至闕陳謝〔中〕敬曰黃大人等欲久留金剛山殿下遣使問安甚數且致珍羞重煩厚意時亦值農是以速還黃大人即欲趁造陳謝聞殿下侍老王之病恐其禮煩動勞使予來謝〔下〕

○丁丑遣清城君鄭擢恭安府尹鄭符如京師告訃請諡也〔中〕禮部遼東則令議政府申

八年六月

○壬辰參贊議政府事柳龍生賈禮部咨回自京師咨曰一件人口事兵部咨該建州衛指揮使阿哈出等奏有奚官萬戶府所屬察罕等一十三戶人民朝鮮國將木答兀連妻子四口送回來了有十二家不曾回還具奏間得本衛指揮莽哥不花等說稱奚官萬戶府有人戶百十餘家東寧衛指揮高塔海帖木兒招到數內頭目失加赴京除授副千戶察罕等十二戶俱係失加同寨管的因是失加除授

回還有朝鮮國王差把關兵馬將失加家小同察罕一十二戶搬裹去訖後有失加家小永樂五年八月內到於建州有察罕十二戶不曾來委係失加所管人數除具奏外移咨到部合行本國取發建州衛住坐仍將發過人數開報一件給聚事兵部咨據建州衛指揮僉事馬完者呈有各戶下人口見在阿罕等處地面住坐具呈搬取除具奏外移咨到部合行本國照依開去男婦口數起發建州衛完聚仍將發過日月回報今開指揮僉事馬完者戶下男婦一十一口見在几連地面住坐六口見在紅肯地面住坐指揮僉事阿哈出戶下男婦二口見在失里地面住坐

太宗實錄 卷十六

八年七月

〔參〕甲寅○以金字爲江界等處都兵馬使判江界府事權衷爲泥城等處都兵馬使判朔州都護府事朴齡吉州道察理使兼判吉州牧事韓興寶慶源等處兵馬使兼慶源府使〔中略〕皆以議政府入抄落點差遣許令挈家赴任

○壬戌遣司譯院舍人任種義管押漫散軍劉莫遂等九十九名如遼東時有遼東前衛前所軍張朱士等四人因領受官馬喂養瘦死無以充立遂結黨潛渡鴨綠江盜民家馬五匹還至方山口子爲守把軍兵所獲義州兵馬使朴矩以聞上曰此人雖是馬賊旣係上國軍人未敢擅便斷罪乃令種義牢固押管解發遼東都司區處

八年八月

〔參〕○戊寅贈陳敬李賓各苧布十六匹人蔘三十斤

○乙酉陳敬李賓還遣世子〔提力〕禔餞于慕華樓
八年九月

甲戌○遣司譯院判官康庾卿管押漫散軍鄭世等男婦共一百十四口如遼東

○遣計稟使右軍同知摠制權緩如京師咨禮部曰朝鮮國王近准來咨內一件爲在逃人口事准兵部咨該東寧衛千戶金聲等奏往朝鮮國取漫散軍餘除取發外有一千一百餘口俱係洪武年間五丁堞一充軍籍定人數本國却作遠年鄉戶官私奴僕等項不發等因具奏永樂五年十一月初一日早本部官於西角門欽奉聖旨朝鮮國王將流移人口成萬家發回遼東復役著業了其餘遺下的怎

肯占恠不發金聲在那裏貪財好酒奸騙人家子女好生不才他不使國王知道密地裏將這些人都賣放了便將金聲那厮拿送法司問罪再著陳敬鋪馬裏賣文書說與國王卽將金聲賣放的人口盡數送回遼東復役(著力)欽此移咨到部合行本國欽遵施行仍將發過人口數目回報准此照得先爲遠年鄉戶官私奴僕等項存留聽候及逃躲幽深山谷未獲人數咨請奏達其間豈有賣放之弊今奉來因行據議政府狀啓欽依差大護軍李懿等將本國東西北面平壤等府州縣原存留聽候遠年鄉戶官私奴僕劉思京等四百七十三口點得數內除身故二十五口外實有四百四十八口及原取挨究未完數內見獲到人口金得富等共一千一百五十三口分作四運差曹士德金有珍任種義康庾卿等於永樂六年月日不等陸續管押解送遼東都司交割了訖今將見解并身故人口開啓得此參

照前事合行依上開坐移咨伏請照驗聞奏施行計本國取勘人口見發過遼東都司人口一千一百五十三口初運劉思敬等七百八十一口第二運李隆等一百五十九口第三運劉莫遂等九十九口第四運鄭世等一百一十四口身故四百五十五口存留遠年鄉戶官私奴僕內二十五口未完見獲各家戶內六十七口永樂五年已經咨報遼東都司三百六十三口

八年十月

辛卯(少力)○左小監祁保禮部郎中林觀還上餞于慕華樓西北面都巡問使上言祁天使迎逢遼東軍官軍人擅渡鴨綠江留連義順館謀欲貿易牛馬或六七十名成羣非獨近處民戶至於五六十里村落乘夜橫行抑賣強奪無所不至此而不禁弊將無窮今後一依都司差批約束毋得擅渡鴨綠江雖或渡江毋得擅行里落作弊

之事乞速移咨都司以憑禁約上曰可及黃天使迎逢軍官未到來之前疾速移文都司知會

〔參〕○辛丑世子如大平館贈田犬各一子使臣儼等屢奉使本國及還以所得田犬贈於指揮等官倍取其直故每至求之甚切

〔參〕○壬寅上如大平館宴使臣贈黃儼等五人各田犬二

太宗實錄 卷十七

九年正月

辛酉〔甲子〕○始置西北面館丞自生陽館至大同館安定至安興嘉平至林畔良策至義順各置館丞一又於各翼左右中所各置副千戶一人又自義州至江界並江居民欲於彼岸朝往夕來之地耕種者聽從都巡問使之啓也

○甲子遣知議政府事契眉壽如京師賀聖節也就賈移禮部咨二道而去〔略中〕其一曰近准來咨奚官萬戶府所屬察罕等十二戶合行取發建州衛住坐指揮僉事馬完者阿合出戶下人口起發建州衛完聚准此行據議政府狀啓備東北面都巡問使林整呈問得故察罕媳婦那難等供稱洪武五年壬子因那哈出到來女直地面闕亂

根同萬戶殷實向國出來於慶源定州咸州等處附籍安業當差又於各官地面及紅肯等處究問馬完者及阿哈出等戶下男婦人口並無吝內開來名字相同人氏具呈得此狀啓據此看詳上項事理所據察罕等戶下人口欽檢到聖朝戶律內一欵節該凡民戶逃往隣州縣躲避差役者杖一百發還原籍當差其在洪武七年十月以前流移他郡曾經附籍當差者勿論又欽蒙太祖高皇帝累降聖旨不分化外一視同仁欽此參照上項故察罕等戶下人民男婦共五十口既於壬子年間流移本國准請十處地面久安生業附籍當差如蒙奏達伏望聖慈特賜明降仍使安業一國幸甚

九年二月

〔參〕○乙酉城平壤義州

〔參〕○丁亥吉昌君權近卒〔中略〕丙子夏大明太祖高皇帝怒表箋有戲侮字遣

使徵撰表人鄭道傳道稱疾來使日督之近自請曰撰表之事臣亦與知願隨使赴京〔中略〕太祖密賜黃金以贖行及渡鴨綠江使臣孛羅與諸宰相問入對之辭而不問於近近曰大人何獨不與我言孛羅改容曰今子無徵命而自往國之忠臣也帝有所問子亦何所對〔中略〕中國使臣必先問近動靜及相接加以禮貌御史俞士吉內史溫不花奉使而來亦於鴨綠江問安否及至都殿下慰宴使臣諸宰相以次行酒禮及近行禮士吉不花皆起坐殿下曰天使何至是也士吉曰何敢慢斯文老成君子乎不花曰太祖皇帝之所致敬者也不花即孛羅也〔下略〕

乙未○司憲府請熙川君金宇之罪疏曰宇曾任江界將貂皮五十領黃蠟十六斤密屬通事朴之成至遼東以貂皮十領買綾二匹二十領買中絹十匹之成之還宇已見代遇諸途以綾絹及所餘二十領還諸宇只以黃蠟還納江界府本府移文其道監司備得其實宇

之橫斂禁物越境興利之罪所宜痛懲以戒後人疏留中不下
九年三月

癸丑（乙卯）○唐船四隻漂至邊郡送人慰送之大明鎮南衛後所
百戶柳貴等三員旗軍一百一十七名漂風至全羅道沃溝自言爲
因迷路上岸觀察使尹向以聞又有指揮孫貴千戶張義等船二隻
漂泊忠清道葦城鎮自言欽奉聖旨差根摠兵官平江伯等前往山
東遼東劉島等處巡捕倭賊在綠水洋被風各船桅舵漂流散失迷
行至此都觀察使柳廷顯以聞皆令厚給修理船隻物件既而三船
遇順風便張帆回去又有浙江寧波衛後所百戶徐鎮帶領旗軍五
十五名漂到豐海道豐州自言運糧北京在綠水大洋忽遇風猛漂
流至此命都觀察使厚加饋餉給鋪馬脚力由平壤道路送至遼東
以司譯院副使崔雲爲護送官

九年四月

丁丑○吾都里仇老甫也寇雍丘站殺擄男女十五人及其牛馬而
去

○戊寅遣判司譯院事契耐管押鎮南衛百戶柳貴如遼東初貴船
自沃溝還至半洋山復遭風漂至瓮津縣乞由陸路回還故也
甲申○有本國人金孟碎被倭擄至遼東帝命付良祐帶回

太宗實錄 卷十八

九年七月

○丁亥西北面都巡問使啓遼東軍人擾民之事啓曰去年十一月天使祁保迎逢遼東軍人乘夜散入民戶據給縣布奪牛一百十六隻馬八匹及過江之日經歷李漬告于天使俾還牛馬天使許之後遼東都司索其價布一千一百三十四匹牛馬之主或見或隱上曰已見價布速還都司將其犯令放賣牛馬沒於官

九年八月

丁巳○誅青州女真千戶朱因刑曹啓因教其子竊人牛馬府使李推使人捕之囚等引弓發矢欲逃入兀郎哈地面爲鏡城鎮撫所獲請依謀背本國律處斬從之

○壬戌謝恩使通事崔雲回自京師雲啓沂國公丘勝將兵二十萬北征上曰今上國兵興其韃靼部落在東者避難必奔於我雖深居朔北者勢窮則亦將來奔矣若北軍勝則南人亦將如之譬如大水支流皆滿矣遂遣上護軍李愉馳告東西二面以備不虞

九年十月

○庚戌分遣各道巡察使李稷于西北面李原于江原道東北面咸傳霖于忠清全羅道朴嘗于慶尙道前都觀察使權軫于豐海道奏聞使吳眞密報朝廷聲息曰韃靼皇帝將重兵屯關中口子外摠兵官沂國公武城侯禦之敗績全師被擄皇帝徵兵諸路將以明年二月北征時國家聞黃儼出來未知其故或傳言請兵十萬將帥二人由東北面挾攻韃靼故有是命

○辛亥御便殿略中召前摠制金仁貴檢校漢城尹朱仁問以韃靼地

境相距遠近仁貴生長瀋陽路世襲摠管至恭愍王時來附仁卽女真遺種也

○己未內史黃儼奉勅書至上率百官以青淡服迎于慕華樓至昌德宮受勅書勅曰王處有馬隨進多少以資國用當酬以直王其欽承朕命今賜王綺帛至可領也賜王紵絲五十匹綵段五十匹王妃紵絲二十四匹綵絹二十四匹上旣受賜訖儼傳宣諭聖旨曰元帝子孫有順附者有不順者其不順者朕欲平之朝鮮之馬雖體小可用也王其送之宣畢儼卽問進馬之數上曰敢不盡力禮畢使臣如大平館上率百官隨至設宴仍贈鞍馬及其伴人

○庚申上如大平館宴使臣上謂儼曰帝恩旣重敢獻馬一萬匹儼曰元帝子孫竄居藜渠河傳世八葉今不來附帝欲以來春平定期以二月初六日動大軍所進馬匹宜分運及期上請於開州站交割

儼曰遼東軍少不可

庚申○置進獻官馬色以李天祐金南秀楔眉壽尹思修爲提調令中外各品出馬有差上命議政府曰朝廷易換馬須於來年正月內畢進獻以戶曹參議趙源爲濟州敬差官量宜刷出軍民家戶馬匹從政府之請也

九年十一月

○甲戌朝廷內史祁保至上以無詔勅不出使世子率百官迎于慕華樓保直到太平館與黃儼屏人語其來爲促進獻馬而揚言求處女上如太平館設宴贈鞍馬保以上不郊迎怒形于色時通事孔明義回自北京言韃靼軍去京不遠皇都危窘西北面都巡問使亦上言人有自遼東來者言王師畏韃靼盡入城堡

〔參〕乙亥○免東北面朝廷易換馬

○戊寅遣禮曹判書徐愈參知議政府事尹向如京師謝賜綵幣也且奏曰欽差太監黃儼賈奉到勅書節該王處有馬隨進多少欽此臣今進雜色馬一萬匹又咨遼東都司曰當職儘力措辦馬一萬匹分運差官陸續解送或一百匹或二百匹隨辦隨解儼若停留卽目天寒地凍草料接應不敷恐致倒損如蒙將見解馬匹隨到隨收照依各運咨內數目轉達施行庶爲便益議政府啓曰今謝賞賜皇太子在南京并遣副使似爲不實請問黃儼然後決之上然之使契眉壽黃喜往問之儼曰依前例

戊寅○西北面都巡問使啓遼東漫散軍處置事宜啓曰遼東軍人相續而來處之如何議政府以爲若來者數少且犯夜越江則納之如成羣則禦之使不得渡江上然之

〔參〕○辛巳黃儼祗保以處女鄭氏還上餞于太平館儼曰鄭氏非美色宜更

求以待上曰國小力薄今所進馬僅萬匹耳若美色則敢不更求

〔參〕壬午○司諫院上時務數條一傳曰國無三年之畜國非其國惟我國家近年以來全羅軍資賑濟濟州慶尙軍資優給倭奴二道倉庫幾乎虛竭甚可慮也惟畜積所在西北一道而已西北之境接於中國時當冰合一鞭可渡況今中國兵興若有一朝之變如紅賊之來先據此道國家將何以應之乎事之至迫悔之何及義州江界雖遣節制軍勢單弱恐難禦之臣等願以平壤以北之勁兵授之良將屯戍要衝待中國平定水解而罷一國之所重者兵也兵之所重者馬也故周制掌兵之官不曰司兵而曰司馬馬之於國其用重矣我國家壤地褊小馬亦有限自高皇帝至于建文所獻之馬不知其幾萬匹今者上國又求馬匹其數甚多有司程督雖有一馬者皆納於官如此則國將無馬言之可爲流涕矣唐之太宗隋之煬帝皆不克而還丹兵紅賊寇我而先亡此非惟山川之險將帥之良亦以有馬故也臣等謂以事大之禮言之不可不獻以宗社之計言之不可

多獻又安知今日求之而明日不求耶伏惟殿下以事大之禮宗社之計

參酌施行略

癸未○遣判司譯院事曹士德管押易換初運馬五百匹如遼東

〔參〕癸未○朝廷內史海壽至義州西北面都巡問使馳報曰內史海壽以十

三日渡鴨綠江至義州無故發怒褫牧使朴矩衣縛判官吳傳欲笞之而

止其行甚速竟不言其所以來之故略

○丙戌遣司譯院判官任種義管二運馬五百匹如遼東

丙戌○海壽至龍泉站遇黃儼授勅書而還上遣都摠制鄭鎮賈宮

醞慰之不及黃儼既見海壽乃曰時方極寒不可以處女行且待春

和再來迎取宜善自梳洗又曰宜加選擇遂置鄭氏而去上嘗謂代

言金汝知曰中國兵興採女豈其時乎乃佯為舒泰耳必於中途還

矣至是皆服上之先見上以朴矩見辱於海壽議欲選人代之若海

壽有問則對以矩嘗失禮於使臣故召而罪之成石璘曰今江水已
合邊警方急且以詐誑人小智也不如留鎮之也上然之通事全義
回自遼東曰遼人密言朝廷傳聞朝鮮起兵助韃靼故使壽來覘之
入境便佯怒以察順逆

丁酉○遣護軍任均禮管押三運馬五百匹如遼東

九年十二月

○丙午遣知司譯院事李子瑛管押四運馬七百匹如遼東

壬子〔甲寅〕○遣司直金仁富管押五運馬七百匹如遼東

戊午〔辛酉〕○遣司譯院副使崔雲管押六運馬五百匹如遼東

○遼東都司遣指揮方俊來義州催督易換馬匹遣吳眞慰之仍賜

苧布二十四匹

○乙丑遣知司譯院事康邦祐管押七運馬五百十四匹如遼東

〔參〕乙丑○命東西北面整點軍容

○丙寅建州衛指揮童猛哥帖木兒遣使來獻禮物上命厚待之

太宗實錄 卷十九

十年正月

○庚午謙真兀狄哈萬戶於應朱欵塞請朝許之

○癸酉遣司直朴茂管押八運馬六百四十四匹如遼東

丁丑○建州衛指揮猛哥帖木兒遣使獻土物

戊寅○遣判司譯院事曹士德管押九運馬三百七十二匹如遼東

辛巳○通事李子瑛回自遼東子瑛言達達軍盛行于開元金山等處官軍遇之輒敗其巡哨軍於正月初二日攻遼東北門不克掠城外居民而去上曰果如子瑛之言則宜飭武備議政府啓兩界守令請以有武才者差遣忠清道三處城子若遣人相地而後築之事緩各從所報卽築之上皆然之遣星山君李稷相廣州日長城修築可

否

〔參〕辛巳○置蒙語訓導官以前奉御周彥前中郎將宋希明爲之

癸未○以金承暉爲西北面兵馬都節制使延嗣宗東北面兵馬都節制使義州通事李龍自遼東還言遼兵一萬赴北京遇達達軍於山海衛與戰大敗死傷過半遼東自正月初二日嚴兵城守晝夜不懈上召政府議之遣承暉等以備之

〔參〕甲申〔丙戌〕○以林整爲東北面都巡問察理使兩界守令皆以有武才者改除

甲申〔丙戌〕○遣淮安衛軍胡原等二名于遼東於德明之還也率日本所擄漢人胡原等來命給衣冠就差曹士德押送仍探中國聲息

〔參〕己丑〔癸巳〕○命除東西北面侍衛軍番上休養以備不虞也

癸巳〔乙未〕○兀良哈毛憐衛指揮寶乙者千戶吾哈主等九人來獻土物

十年二月

庚子○兀狄哈金文乃葛多介等結吾都里兀良哈甲兵三百餘騎寇慶源府兵馬使韓興寶與戰敗死毛憐衛指揮甫乙吾使人謂興寶曰聞諸建州衛指揮阿古車云將有賊兵侵慶源宜預知備禦興寶不之信翌日黎明賊兵已至城外興寶蒼黃帥戍兵百人出戰興寶所騎馬中矢而斃興寶中三矢僅得入城三日而死官軍死者十五人馬死者五匹賊遂圍木柵不克焚柵外廬舍蓄積殆盡

○癸卯通事朴茂回自遼東茂言韃靼兵稍息遼東無城守之警軍民牛羊畜牧郊野無異平日有內史謂茂曰皇帝與你國王親如父子爾國之臣所知汝還本國速進馬匹如約後雖十萬匹何益上謂

議政府曰事大之禮不可不謹如朴茂之言則道路無警且聞方指揮復來義州催取馬匹正可催督畢進卽遣戶曹參議吳眞如義州宴慰方俊遣司譯院判官姜庾卿管押十運馬五百三十六匹如遼東

丁未（己酉）○遣司譯院舍人金貴隆管押十一運馬四百九十五匹如遼東

○命吉州察理使趙涓往伐兀狄哈東北面兵馬都節制使延嗣宗馳報韓興寶敗死之狀上驚駭以興寶爲國戰亡賻米豆四十石紙百卷命歸葬上欲討兀狄哈悉召曾守慶源者問方略趙英茂等啓曰今兀狄哈等無故入寇殺邊將釋此不討彼無所懲波乙所指揮亦兀狄哈之別種也居中兩投亦當並滅請令吉州道察理使調其道兵馬一千以往則可一舉而滅之也上然之以大護軍朴楣爲敬

差官如慶源體探事變命回還之日率接戰時軍中穎悟者一人以來以僉摠制郭承祐爲慶源鎮兵馬使行司直安乙貴爲慶源鎮左右翼都千戶令馳驛赴鎮上又命議政府議之河崙成石璘對曰葛爾山寇勝之不武且此寇本鼠竊狗偷非欲抗大軍臣等恐師至其境卽逃竄山谷師退則復來侵擾徒勞王師而啓後日之邊釁也趙英茂柳亮等啓曰小寇敢肆毒於我境不以此時往殄滅之卽無以示武也且非止此寇而已吾都里兀良哈雜種亦無所惧矣不如一舉而滅之上從英茂等之議使趙涓爲主將前都節制使辛有定前同知摠制金重寶爲東北面助戰節制使有定以下皆受涓節度有定家貧故令議政府量給米豆以養家屬又賜襲衣弓矢以遣之上謂宰相等曰慶源但德安二陵在耳遷陵古亦有之遷陵廢郡退守鏡城如何皆曰可乃命議政府擬議陵室奉遷便否以聞

庚戌○柳廷顯徐愈等回自京師廷顯等至北京帝聞本國進征馬萬匹對之有加又聞廷顯爲顯仁妃權氏之族使黃儼傳權氏命別賜綵段二匹絹十匹鈔五百張鞍馬及辭還帝曰汝等還國報于國王將易換馬不分星夜快攢的來廷顯啓于上曰帝欲以二月十五日親征韃靼抄諸路軍諸路城子男無餘丁老弱婦女亦不得出于城外禁兵侍衛而立食外卒牽車而轉輪上問達達先來侵歟帝欲先往征乎廷顯言達達之來侵臣等未之聞也但聞沂國公率禁兵見敗於賊故帝欲雪其恥將往征之上曰彼來侵我不得已而應之可也若我先勞民而往征於窮荒之地可乎不勝則必爲天下笑矣壬子○司諫院上疏請停北伐且論朴齡曾任慶源兵馬使擅減軍額吉州察理使趙涓不能固疆致野人敢肆侵暴請治其罪○癸丑遣司譯院副使崔雲管押十二運馬四百六十九匹如遼東

〔參〕癸丑○命給慶源府戰亡人及火家舍米粟者穀有差

癸丑○西北面都節制使金承靈請禁義州軍民越江耕田下議政府議之

乙卯○遣典醫少監張有信管押十三運馬五百九十八匹如遼東

丙辰○遣護軍任均禮管押十四運馬五百六十四匹如遼東

○丁巳流成均注簿金久問于槐州初朴茂等未還邊報相傳達達兵深入關塞寇掠自遼東至燕都路梗不通會久問差進賀聖節使書狀官憚行以疾上箋求免辭甚哀切上覽而憐之命改差司諫院劾啓曰久問在平日優蒙顯秩奔馳利路未有疾病今當奉使之日適聞中國兵興托疾規避其奸甚矣如久問者別無材行幸托科第厚蒙恩渥固當不顧死生竭力盡忠以補聖恩之萬一乃懷奸計求安一身乞命攸司收其職牒鞫問其罪以礪士節下略

丁巳（己未）○遣知司譯院事張洪壽管押十五運馬六百匹如遼東

己未（壬戌）○命發青州迤北軍馬一百五十以濟北征之師始韓興寶既死猛哥帖木兒聲言捕賊率兵到慶源宿所多老翼日宿吾農草遣千戶金希周謂趙涓曰今來入侵兀狄哈乃探州葛多介具州金文乃等也若不追捕深處數多賊人並生輕易之心不無頻頻入侵之患察理使須領兵馬追逐吾當同力助戰涓乃使希周復歸童指揮之所童指揮謂希周曰察理使如有追捕之心則潛師入來以慶源築城爲名且使人潛通於我則我領兵同行出賊不意而掩襲之童指揮之弟於虛里亦曰草木茂盛則捕賊爲難宜速行兵若朝鮮出鐵騎四百我等以二百騎會則可以勝戰涓以報都巡問使林整整以聞且使希周詣闕告狀上召議政府舍人趙啓生曰童指

揮若誠心助我則固可喜也或與賊人相結而爲此言以誘我亦未可知所以對之之辭務盡事情集議以聞領議政府事河崙以爲自古越險攻敵罕能成功今自慶源至彼賊人之境經數百里道途之間必有險阻然則我反爲致於人賊之強弱衆寡臣所不知意其介居山谷合散不時或邀於險阻或起於夜半出人不意來攻則恐大軍之見挫於小醜悔之無及不若堅壁固守待其來而應之也左政丞成石璘以爲往征之計已定不可中變宜亟進兵縱未能剪滅渠魁但令蹂躪賊巢燔燒廬帳而還可矣右政丞趙英茂以爲童指揮消息之勢疑已與彼賊同謀請按兵不動待四月草長出其不意輕行掩襲可以得志啓生以三議啓上是石璘之策且曰賊已知我往征不可輕舉乃有是命李天祐啓曰今討兀狄哈三相之議不同如之何上曰策已定矣何復爲異論宜令趙涓退師吉州其在慶源之

軍聲言修築城堡待彼懈而弛備以三月晦四月初卽出兵掩擊遂遣鎮撫趙琛于趙涓授以事機金希周來見命之曰兀狄哈向天子不忠今又無故侵我邊疆罪當討捕然叢爾頑凶何足數乎故置而不問今童指揮旣欲出兵追討又送人于我欲爲向導誠欸可嘉賜希周衣冠及靴

壬戌○遣上護軍李和美檢校漢城尹崔也吾乃如建州衛賜童猛哥帖木兒苧麻布各十匹清酒二十瓶觀其意也

癸亥○以大護軍黃碩中爲東北面敬差官遣酒饌于童猛哥帖木兒

○遣司譯院舍人兪興俊管押十六運馬七百十七匹如遼東

○甲子遣司譯院舍人閔光美管押十七運馬四百二十三匹司直朴茂管押十八運馬三百八十四匹司譯院判官吳義管押十九運

馬二百八十七匹如遼東遼東都司使舍人李進到鴨綠江催督易換馬匹

十年三月

丁卯朔○遣中軍護軍田興于東北面賈宮醞往慰北伐將帥也仍傳旨曰賊奔則追之不過一二日程若竄伏不退者窮搜以捕

壬申○吉州道察理使趙涓率兵過豆萬江助戰節制使辛有定金重寶慶源兵馬使郭承祐從之

癸酉○遣刑曹參議柳謙如京師奏本曰永樂七年十月二十一日欽奉勅書節該王處有馬隨進多少以資國用當酬以直欽此臣於本國宗親及文武大小官僚并百姓有馬之家儘力措辦雜色馬一萬匹分作十九運差人管押送赴遼東都司交割了訖

乙亥(丁丑)○吉州道察理使趙涓等至豆門誘殺毛憐衛指揮把

兒遜阿古車著和千戶下乙主等四人縱兵殲其部族數百人燔燒廬舍而還生擒男一名女二十六名及將士所獲人口男女并若干人於是趙涓以捷音報議政府曰涓於二月二十九日與辛有定金重寶郭承祐率領軍馬一千一百五十名發吉州至三月初六日到吾音會童猛哥帖木兒在處獲童巾接兀良哈指揮阿亂孫子加時仇問得慶源入侵賊黨乃具州接兀狄哈金文乃葛多介將老多非乃及童指揮管下安春喫里等數十名豆門接甫乙吾管下崔哈兒不花等也又聞童指揮聲言助戰領兵至慶源府所多老掠取各戶家財牛馬甫乙吾托以謁見察理使多率徒衆經過所多老恣行槍奪初九日至兀良哈指揮阿古車居處豆門獲加時仇兄哈兒非問得葛多介金文乃當初同至大父阿亂處與甫乙吾阿古車著和等管下同議入侵其具州葛多介等賊類本是五戶童指揮使人告以

朝鮮行兵問罪曾已逃匿騎山竊謂兀狄哈兀良哈吾都里女真男女相婚並是族類互相主謀羣聚爲盜擅入邊境掠奪牛馬殺傷人物至乃擅開國庫爲害已甚童猛哥帖木兒初稱同力捕賊明爲期會今則傳通東良北人領兵退屯阿古車把兒遜著和等亦於豆門一會伏兵要害與童指揮相應構亂已將賊魁阿古車把兒遜著和及下乙主等及管下軍人一百六十名捕斬其金文乃等初非首謀亦已逃竄累日程途難以進兵已於慶源府所多老退屯待命及報至上曰指揮等皆受中朝職事今而擅殺是生釁於上國也宜速奏聞其生擒人口悉令推刷還本

壬午○遣大護軍張大有賜毛憐衛指揮把兒遜建州衛指揮甫乙吾酒各二十瓶苧麻布各十匹毛憐衛千戶升尙金庸苧麻布各一匹賞其先告賊變也時趙涓捷報未至

○議政府啓金文乃葛多介或受中朝官爵請移咨遼東然後伐之上曰金文乃等受職於朝廷我國所不知況邊境之寇察理使以邊將自伐之不必通諭也成政丞明日當來來則更議之

甲申○西北面都巡問使朴嘗得皇帝親征北狄詔書錄本以獻詔曰朕受天命承太祖高皇帝洪基統馭萬方撫輯庶類凡四夷僻遠靡不從化獨北虜殘孽處于荒裔敢肆兇暴屢遣使申諭輒拘留殺戮乃者其人鈔邊邊將獲之再遣使護還復見拘殺恩旣過背德豈可懷況豺狼野心貪悍猾賊虐噬其衆引領倏蘇稽於天道則其運已終驗於人事則彼衆皆離朕今親率六軍往征之大振武威用彰天討且朕必勝之道有五以大擊小以順取逆以治攻亂以逸伐勞以悅弔怨鮮不殄滅蕩除有罪掃清沙漠撫綏顛連則疆場又安人民無轉輸之苦壯士無飢寒戰鬥之虞可以解甲高枕一勞久安暫

費永寧布告中外咸使聞知

戊子（辛卯）○議政府啓東北面區處事宜一請增慶源鎮戍兵數百二出征將帥乘勝欲圖猛哥帖木兒然時已緩彼且必有備當農月不可再出請放散軍兵召還將帥三生擒孛兀兒等三人囚于青州若孛兀兒宜及彼人未知生死之前速誅之其金庸升尙二人轉致王京鞫問徐議處置上皆從之乃命慶源鎮加置師旅嚴整備患

○辛卯遣中軍摠制李玄如京師奏本曰議政府狀啓據東北面吉州察理使趙涓呈二月初四日有賊軍突入慶源府殺死兵馬使韓興寶及軍士一十五名搶奪牛馬錢穀回去卑職欲行追捕間有慶源接壤毛憐衛指揮兀良哈把兒遜著和等遣人通云遠處山谷間散住兀狄哈前來慶源府作賊回去又有建州衛指揮吾都里童猛哥帖木兒遣人通書稱云若欲追捕前賊我亦領兵同捕卑職隨卽

領兵追捕上項賊黨行至豆門猛哥帖木兒托故不進要路有伏兵起發挾攻互相擊射彼我軍士殺傷數多不意把兒遜阿古車著和下乙主等乃與兀狄哈等通謀作賊設計伏兵邀擊我軍以致中傷身死呈乞照驗得此狀啓參照兀良哈吾都里等地面接連本國地境今來把兒遜等與兀狄哈同謀殺害邊將軍民今又伏兵邀擊反致中傷身死切詳上項把兒遜等曾受朝廷職事不勝惶恐理合奏聞尙慮兀良哈吾都里黨類連生邊釁不便伏望聖慈明降禁約一國幸甚

壬辰（甲午）○召趙涓還議政府啓趙涓所據甫乙吾若放還則入其故里積尸蔽野屋廬燒盡妻子朋友皆已死亡雖一宿一飯亦無所寄怨極于天必告諸天子誓死復讎矣不若托以與升尙金庸逃走殺之豆門之戰趙涓等執吾都里哈兒非加時仇問以賊變遂並

殺之二人皆童猛哥管下指揮阿亂之孫也猛哥由是怒甚謀入寇上乃以延嗣宗代趙涓政府請遣田興於童猛哥帖木兒賜以宣醢諭之曰此兵之舉非國家之命實邊將之擅興國家已使延嗣宗代涓召涓赴京欲治擅興濫殺之罪則猛哥之怒稍解而後日朝廷之詰問亦可對也上曰政府合議須以義而爲之惟送酒諭童指揮一事有何所因恐無言可執不若使田興只呼趙涓而來漸使童指揮知之乃以田興爲敬差官而送之

〔參〕丙申○築西北面諸州城都巡問使朴嘗啓今春新築成州屹骨山城修築慈州山城德州金城朔州城陽德縣城江界府城古雲州白壁山城古隨州香山城又仍前歲之役作義州城三門及置弓家短牆功已訖

十年四月

○庚子命誅慶源千戶不救主將者義禁府啓先潰而走者四人上

曰四人不可盡誅誅其尤重者一人亦足以徵千百人矣大臣對曰誠如上教有一人中箭至傷甲之二札者其非潰走也的矣四人之罪豈無輕重因啓韓興寶之弟興貴隨兄力戰又有武才宜於武職敘用又啓興寶有四女皆未嫁其長以父死家貧欲爲尼願賜資粧以嫁上從之

辛丑○童猛哥帖木兒寇北邊帖木兒弟於虛里與吾都里仇老甫也等結毛憐遺種合步騎百五十餘人至慶源雍丘站殺擄男女二十名馬十四匹牛八頭而去是後又有賊二十餘名隱於鏡城富珍汀邀殺慶源鎮撫權乙生等十五名又有一百餘名侵時原站林整飛報賊兵爲寇不止時原等處人皆騎山避寇道路不通慶源兩陵朔望奠物與兵馬使廩給未及輸送賊人相續侵掠故富家站以北人物不耕一畝皆有離心

壬寅（甲辰）○遣人于慶源府迎朝廷公差張小旗等五人以來東北面都巡問使林整啓據慶源兵馬使呈本年三月二十二日有大明公差小旗張五十六羅仁保等五人連名狀稱去戊子年三月十四日皇帝遣摠旗揚（弔）失里吉及我等六人賈勅諭招安朝鮮近境海邊兀里因接骨看兀狄哈甫彼劉明可河毛憐接亏末應巨等十一月十三日到希刺溫衛逢見兀狄哈指揮豆稱介問前頭甫彼等人去處時有曾入朝病死阿知亏羅等人親弟趙籠介等疑其兄死乃射殺楊失里吉次欲害及我等等騎山到來府東村朱毛端里乞食資生前年十二月二十九日豆稱介等跡至欲加害奪我騎馬三匹上項吾都里兀良哈既背大明亦侵貴國作賊遮路至使我等不得還朝衣食乏絕無可奈何願轉聞殿下使還本國上覽之卽遣議政府知印柳盤給雙馬倍道馳至謂小旗等曰我國未知官人到境

上寄食民戶今都巡問使以聞殿下驚恐卽命我往迎敬此不分晝夜而來又命沿途各官精備供億上曰今聞張五十六等六人奉聖旨招安兀良哈至其境則射殺上官人其餘五人無所歸來投我境此賊旣反上國又侵我疆今之往伐上國有何辭焉待五人至賞賜厚待送還上國可也

丁未（己酉）○中軍護軍田興回自吉州興啓曰今月初五日童猛哥帖木兒使其管下千戶李大豆至青州謂察理使延嗣宗曰若還所擄男女則吾將俾還本土各安其所然後詣朝鮮肅拜儻予有故遣子以謝嗣宗如其言皆遣還先是趙涓欲使崔也吾乃遣還俘口也吾乃未發而大豆適至故也吾乃不行嗣宗問大豆以敵情大豆曰初愁州著和弟之大祿時來告於童指揮曰著和與豆門接阿古車伐時溫接把兒遜等相議曰我等各率麾下兵伴從察理使往征

具州使時應巾接高里寶里加下羅接加羅青浦接阿亂童巾接下乙主東良北接他時阿之郎貴接伐乙所等各率其軍而後至當朝鮮攻金文乃葛多介非乃毛當介將老之時使我爲先鋒吾若倒戈與金文乃等合兵攻其前使高里寶里截其後則朝鮮之軍腹背受敵必至於敗矣察理使先事掩擊大有殺獲此天之使然歟抑朝鮮之威靈有所見聞而知歟遂大痛哭大豆又言著和等見伐之狀指揮時未奏聞田興曰吾聞童指揮之子與把兒遜子偕如京師汝何諱之大豆曰把兒遜之子尙未收葬其父屍何暇朝京奏聞乎
○田興又言郭承祐伐兀狄哈之時身勞脫衣中風得病上遣醫員元鶴治療

〔參〕己酉○東北面助戰節制使辛有定金重寶復命

己酉○兀狄哈寇慶源府兵馬使郭承祐與戰敗績丁未有賊三十

餘騎登慶源阿吾知南山以示我軍戊申賊步騎五十餘登於汝火山上俯瞰城中倘佯不下欲致官軍已酉昧爽都千戶安乙貴孛五十騎覘賊晡時邏卒來告曰賊數十騎於阿吾知洞裏乍出還騎山矣兵馬使郭承祐卽率數百騎追之賊數騎遇官軍佯北承祐逐之旣入洞賊伏兵四合猝擊官軍大敗死者七十三人傷者五十二人戰馬百二十匹及兵甲二十四部皆爲賊所奪承祐亦中矢率三十餘騎潰圍而出入保阿吾知木柵乙貴遇賊亦敗只以十餘騎入城賊衆數百隨至而圍之童猛哥帖木兒亦至問承祐存沒且曰吾都里指揮殺之何罪承祐出語之曰彼負國恩來殺興寶故也我殿下謂汝可信汝何同來作賊乎以片箭射之賊乃解去居民死者二十九人被擄者十二人賊皆有父母妻子之讎冒死來戰而承祐恃勇無謀故敗賊退之後遣人跡之賊燒戰死之屍者四十八處野人之

俗凡有戰死者必燒之歸其骨於父母妻子云

辛亥（癸丑）○吉州察理使延嗣宗發青州兵三百救慶源府次于龍城歧

○趙涓還自吉州入見上曰兀良哈等又侵我邊鄙殺害人物宜具情狀奏于朝廷仍問大臣曰若此則未知皇帝對之如何將曰朕將制之乎汝國便宜處置乎若曰便宜制置則是帝心不肯託言以觀吾所爲如何耳今奏本但具錄事狀不可謂欲行報復又不可謂待朝廷之命也或賊又來侵門庭之寇當不待帝命利用禦之河崙成石璘趙英茂等皆曰唯唯臣等未知帝意然帝豈曰朕將制之乎上曰宜速奏聞李玄旣奏聞於前又遣人繼奏於後則帝亦信其賊黨相繼而侵也李膺進曰皇帝若曰汝勿報復朕將制之則於我國實爲未便無乃直啓以報復之意上曰未可前此旣不奏聞而行兵今

又奏請如此可乎上又曰吉州飛報有於虛里者同來卽童指揮之弟也然則童指揮之黨必同來作賊矣伊誰明見於虛里乎英茂對曰延嗣宗報豈不實哉童指揮與謀明矣趙涓曰賊兵數至百五六十則把兒遜之遺種不如是之多也必童指揮把兒遜等之管下卷土而來也上曰然又曰慶源置府爲陵室也彼賊必世爲邊警予欲遷陵而移府然則彼賊胡爲來哉羣臣皆唯唯膺曰然則無乃彼有蠶食之漸我有削土之恥哉上曰不然每於春秋往逐之則彼自不得耕穫矣何憂乎削土膺對曰與其遷陵移府而每歲往逐不若固守而禦之上曰不然毋以爲慮議者皆非膺獨金漢老議與膺同石璘又啓曰若厚待張五十六等遣還可得其心而因可以達彼賊之惡于天聰矣上然之

〔參〕○甲寅召趙英茂李天祐黃喜等至便殿議禦賊之策以林整報郭承祐

敗狀也

己未〔辛酉〕○命僉摠制盧原湜爲慶源助戰兵馬使率慶源鏡城吉州端州青州人爲甲士者百五十人赴防賜原湜廐馬弓矢以遣之初上謂大臣曰慶源之事何更無報歟無乃陷沒乎對曰城必不陷此賊前攻韓興寶之時祇以木箭燭火射城中城中人隨拾隨滅得以不陷其技止此耳安能陷城上曰此賊但恃弓矢而無他術諸卿之議或然矣若城陷則飛報必速且曰予聞鏡城兵馬使金乙和善修城堡且治軍士可以保守柳亮對曰臣知其爲人勤儉可用上又問乙和才藝亮曰能於騎射但不識字且戇上曰郭承祐見敗者亦以有才而不識文字未嘗諳練故事也至是都巡問使林整啓向者賊兵入寇慶源進而圍城至夜乃退翼日又圍城不克而退伏兵山谷賊謀可畏軍馬不敢出城外芻豆俱盡乞加發軍兵救援故有

是命

○命議政府賜賻戰亡人復其戶韓興寶既死慶源之民畏賊不能安業郭承祐率其民去蘇多老城退保阿吾知木柵自固及承祐敗北民益畏懼未敢出原野畜牧耕稼咸願避敵于龍城之地林整延嗣宗以啓議政府啓曰慶源居民移置鏡城則勢若怯懦賊益興矣況初設府專爲守陵室而亦屏捍國家也今乃漸退其民則後日將何以還入乎且以地圖考之蘇多老去二陵九十里阿吾知三十餘里其於守護陵室甚合其地品雖不及蘇多老之沃饒抑又次焉以待敵言之則蘇多老四面受敵救兵亦不易至若阿吾知則有險阻可依前後救兵有相及之勢軍民將有效死之理仍置其民使盧原湜率兵據此與郭承祐固守吉州民事則權令判官掌之延嗣宗入鏡城同兵馬使金乙和守之則慶源之民頗得蘇息雖農業不實猶

可及種晚粟大豆爲慶源計不出乎此郭承祐雖敗軍傳曰寡固不可以敵衆非承祐孰能如此身傷馬斃潰圍而出臣等以爲送宣醢馬匹慰之可矣上曰慶源之計政府之啓得矣承祐之功則雖政府不言予固知之欲賜以戰馬將軍馬死而賜之馬身傷而送酒救療可矣然名爲敗績而特賜宣醢於法何如更議以聞政府使金孝孫啓曰上教允合上曰宜速差人傳旨乃令議政府知印韓宗會賜郭承祐酒及藥且曰馬則路遠不可授汝馳去明日當授盧原湜以遣汝其不分星夜馳往諭以予意議政府啓曰慶源將卒與兀狄哈接戰敗績其間事狀不可盡信請遣朝士一人軍卒死傷兵器被奪之數人民耕種便否詳察而來上曰然遂以上護軍尹夏爲東北面敬差官令空其城只留軍士

○辛酉遣司譯院直長金有珍管押張五十六等如遼東略

甲子（五月丁卯朔）○命移慶源府于鏡城延嗣宗上書曰今月二十四日慶源千戶安乙貴呈稱遣通事崔龍守覘賊形勢吾都里則領兵於仇老家近地屯駐造防牌且潛使軍馬聚於深處或百餘人或五十餘人甫也之子土穩則率五十餘人橫行於雍丘站要路檜峴等處哨馮烟氣相望慶源四面爲賊所圍城中儲糧皆已虛竭軍民乏食不得樵牧牛馬飢困願於鏡城移排以活人命上覽之謂知申事安騰左代言金汝知曰慶源移置予計已定胡爲多談至今猶豫乎亟命遷之

○遣前恭安府尹朴惇之如京師奏本曰議政府狀啓據東北面都巡問使林整呈備吉州道察理使延嗣宗牒呈永樂八年四月初九日據慶源鎮撫王庭狀呈本月初四日有蘇州賊人所訖刺與親弟加乙土等五十餘名於山谷間潛來本府地面劫掠即將民戶男女

共五名耕牛二隻射殺搶奪馬三匹前去本月初五日有吾都里童猛哥帖木兒親弟於虛里與仇老男者刺老等一百五十餘名潛來本府雍丘站劫掠放火燒毀房舍射殺男女共一十七名及牛八隻又將男女五名馬十匹搶奪前去得此本月十二日有吉州居住金添祐告稱本月初十日因覘親姪慶源留防軍金洵路經富珍汀有賊軍二十餘名潛伏路邊放箭射死同行鎮撫權乙生及軍人等一十五名告乞施行得此本月十七日慶源千戶安乙貴狀呈本月十三日辰時有吾都里仇老甫也失家甫里哈刺末乙彥仇里老達音般老也厮秃金文乃葛多介等率領一千餘兵前來本府阿吾知城北闕擾作亂將兵馬使郭承祐左腿射傷鎮撫金玉鄭賢等及伴倘軍人共七十三名盡被殺害又鎮撫金呂生朴彥貴等軍人五十二名中傷生死未知彼軍或戰或退賊謀難測參照兀良哈吾都里兀

狄哈等類隣接小邦連連結黨侵犯邊境殺害軍民劫掠財物^(搶奪)牛馬除先差人奏達外今來益加搔擾致使邊鄙不寧爲此謹具奏聞

○司憲府上疏請漢平君趙涓之罪疏論涓伐兀狄哈之時以主將處置失宜輕犯賊鋒以致侵暴之罪上曰涓何罪之有遂火其疏

十年五月

丁卯朔○遣大護軍朴楬令金乙和率兵七百馳至慶源宿衛陵室遂如豆稱介處招安而來東北面都巡問使延嗣宗啓曰慶源兵馬使郭承祐先騎船入于紅島四月二十三日都千戶安乙^(貴力)遣使老弱先行率留防軍殿後承祐遇於雍丘浦欲騎馬偕來瘡甚不能乃還騎船乙貴率其人民士卒來于鏡城臣既部分人民處之龍城給閑曠地賑貸種子口食以勸農業請將乙貴及左右翼千戶囚鏡城獄

鞫問擅自棄城之罪議政府啓曰慶源陵室在焉不可緩也宜亟命鏡城兵馬使金乙和往戍毋使彼賊來侵上曰慶源士卒勞憊不可復遣可以他兵給二三朔料往戍又謂代言等曰予甚喜民人老弱無事而來也安騰對曰臣亦甚喜但乙貴不待朝命擅棄邊城最爲不可上急召成石璘趙英茂議之且曰吉州察理使不能施令於軍鎮必矣乃命朴楬遣之

○議政府啓曰安乙貴棄城而退雖以民之飢困然非古者折孩而纍効死不去之意也又無王命擅自移民法固當問請使尹夏觀其形勢然後斷之上曰尹夏既將命使盧原湜與乙貴領兵還戍想已行矣對內雖已入戍今下此命則捕還牢囚何難之有從之

○童猛哥帖木兒遣李大豆來曰著和把兒遜管下侵慶源之時予亦同來者爲其所逼勢不得已耳非予本心今棄舊土而從退域人

多地窄生理良艱願殿下使通曉言語若金同介者來諭予當遣子入朝還我舊土矣上曰大豆且厚待之東北面察理使亦啓骨看兀狄哈豆稱介不與賊同謀而入于海島往往使人于慶源以通其情金同介本骨看兀狄哈之種也請遣之招安上許之猛哥帖木兒貽書吉州察理使延嗣宗曰久隔未見今聞來鎮喜甚前察理使率國家大軍本爲制正野人兀狄哈金文乃葛多介等作賊人托以道遠不肯直指其地却於中路將毛憐衛掌印官員百姓盡行殺害今被殺害人父兄弟之遺在者逼迫我云指揮今若不去向朝鮮則指揮必與朝鮮通書定計欲挾攻我輩審矣予亦不得退避且提兵迎留上項毛憐衛死亡遺種已先至阿吾知地面予乃領兵隨至禁其侵掠本欲率領還歸慶源軍馬到來接戰兩相殺害毛憐遺種欲將慶源官家破毀家屬錢物牛馬並皆奪取以快其忿予誘之曰予已

使人詣朝鮮請將擄掠人口放還莫如退軍各還舊居及李大豆還言前察理使國家議罪拿歸今好察理使到界欲修舊好更使李大豆前往若盡還擄掠人口使彼我人口依舊居生則此實係令公聲譽美事予謂此事莫如寢息儻連釁不已數多種類作賊擾邊視聽非祥惟斟酌施行李大豆之還仔細報道於虛里亦移書嗣宗大略如大豆之言且列書吾都里被擄者三十八名甫乙吾管下被擄者七人之名曰儻不死亡乞賜放還且求妻弟之子都好仇老等嗣宗以其書聞上謂代言曰大豆何爲而來哉童猛哥帖木兒自言慶源之役予雖與焉非本意也其果然歟無乃托此誘我以爲自安之計乎外似求和心欲誘我因來覘我國事變乎對曰其言攻慶源非本心特詐耳臣等意其欲覘我而爲自安之計也賊謀幽深未可知也○議政府啓曰童猛哥帖木兒遣李大豆請和且曰大豆之還遣子

弟入侍此必詐也然不逆其詐且賜大豆衣櫛以遣觀其誠否上曰上國待我使臣必有可厚之事然後賜以衣櫛今童猛哥帖木兒領兵作賊殘破慶源殺擄人畜以快其心又謀自安之計乃遣大豆求和今我既無聲罪之舉反賜衣櫛則無乃恟懦歟遂不許

〔參〕丁卯朔○以麗山君金承霖爲東北面都體察使召廣興倉注簿李鑑命勿懲安成萬濫受祿俸以成萬復從承霖赴征也

己巳○免西北面民戶給屯田西北面都巡問使朴嘗上言道內人民去年春秋築平壤城今春修義州等諸州山城艱苦殊甚又自去年仲冬易換馬各運押送官護送軍八百十三名炊飯軍七十名騎卜馬四百八匹驅人四百八名各牽馬軍五千名往來遼東絡繹于途飢困之苦實倍他年新穀未登之前民生可惜平壤城子若使待秋畢築則乞免戶給屯田以恤民瘼從之

〔參〕癸酉—丙子○罷判濟用監事崔原濟濟用監李暉職流前中郎將金仁富于外方暉與原濟自外考滿召還仁富以易換馬押送官回自遼東皆於文字外擅率騎馬驛吏司憲府劾啓也

丙子—(戊寅)○遣行司直金同介招安骨看兀狄哈豆稱介等居慶源塞北海濱不事耕稼以漁獵爲業上慮其與兀良哈通謀擾邊以同介乃豆稱介之族人故使往招之

辛巳○賊寇慶源盧原湜與戰敗績原湜率甲士爲中軸前判事金成前護軍魏臣忠率吉州端州兵爲左右翼追之賊佯走至一里許大呼反攻左右翼先潰甲士亦北有司直金加勿奮禦逆戰射殺一人又刺一人賊頗不敢近俄而原湜亦中矢賊縱兵大至原湜與軍士奔入新柵金成等所管軍人斬二級報書至上召大臣議曰賊人野處天方靈雨草木深茂固知其不可攻也然禦賊之術與其裹糧

坐甲宜亟伐之以雪前恥若待秋涼賊必遠遁矣河崙對曰宜深溝高壘以待之不宜輕動乃止

〔參〕壬午○遣大護軍趙定于東北面以選女真子弟可備宿衛者也

〔參〕○丁亥以上護軍河敬復爲吉州道助戰知兵馬使賜弓矢遣之

○戊子遣巡禁司司直宋寅于東北面執延嗣宗以來東北面都巡問使林整馳啓龍城之戰察理使延嗣宗提兵駐吉州不進救我師敗績軍官死者五人傷者二十人戰馬死傷者三十匹餘平民馬匹被奪者亦多賊退之後得賊屍惟四處而已鏡城以南人民驚動登山不事農業吉州居民亦皆驚擾不卽田畝適有嗣宗伴人至京問之卽曰彼軍但四百我軍八百以甲士不力戰而走遂敗上大驚命嗣宗私馬上京右政丞趙英茂知議政黃喜參知議政李慥等詣闕啓曰臣等備位宰相不能輔翼上德至使盜賊縱兵邊鎮擾亂誠可

痛心爲將帥者固宜晨起蓐食聚兵丘陵願望賊勢賊已退息則分遣斥候據高岡而後解鞍秣馬以休軍士可也今原湜等不謹斥候賊鋒奄至而倉卒與戰其能不敗乎都摠制李和英其麾下士皆欲爲主將死若遣之賊可制矣上曰嗣宗若非功臣當以法論但以功臣只令私馬而還和英雖非功臣（子九）待之以功臣之例宜別擇素有威望者遣之英茂曰遣和英擇人爲褊裨則可矣若非和英無異前人黃喜曰嗣宗之事豈無公論若和英有失則殿下亦不得庇之上許之英茂曰嗣宗自爲諸軍府令史時與臣俱爲太祖麾下相庇之心不可勝言然於觀聽不可不示以公道宜使縛鎖以來至京貸以寬典可也上曰雖不縛致使人執來亦可以示法於是和英代嗣宗教之曰今賊勢益熾諸將屢敗政府請以卿爲察理使和英對曰殿下畜臣崇爵厚祿如臣小人將何用之雖使之入水火其敢辭乎

既而有命和英竟不行命元鶴留治戰傷軍士

〔參〕戊子○議政府啓曰東北面軍資唯六萬石今防寇戍卒幾八九百除夏三月份費與還上分給之數則其餘不過二三萬石防寇之遲速未可知也請漕江原道軍資于東北面〔下略〕

戊子○以禮曹參議朴矩上護軍崔閔德爲東北面助戰知兵馬使賜弓矢遣之東北面都體察使啓彼賊加備兵器今戍禦之卒皆疲困三兵馬使皆中箭不堪與戰請更遣將帥二三人精兵一千備禦議政府啓賊勢益張今遣河敬復豈能獨當哉故有是命

〔參〕戊子○平道全言於政府曰朝鮮之人未戰之時先有還家之念豈能勝敵乎予則忘身委質赴敵之日當先殺妻以固其無回還之念胡爲不勝哉若遣我則必有以報國矣政府以啓道全時有小疾知申事安騰問曰若汝疾何道全曰吾生長海中山行水宿今安枕肆志暫不運動故致氣

澁而疾作今若受命發行則疾當自愈若予戰亡而不還則予之爵祿願以傳之吾子上壯之命率其徒十餘人以往

〔參〕○命議政府遣人于慶源府就審陵寢

○庚寅遣西川君韓尙敬如京師奏本曰陪臣金定卿回自北京欽聞車駕巡幸北方謹差陪臣韓尙敬賈擎進獻禮物前赴行在欽問起居議政府啓曰東北面賊變因尙敬之行附奏如何上曰此行專爲問安也不可兼以他事若使之因便上達則可也

○乙未奏聞使李玄柳謙回自北京時帝北征深入虜地皇孫監國留都官不許赴行在乃還

乙未○東北面敬差官尹夏朴楣復命夏等啓月十五日臣等在鏡城郡辰初有人來告賊寇龍城臣等卽與金乙和率二十餘騎急趨龍城賊已圍新柵數重三騎據古柵橋使不得進旣而賊衆益至金

乙和中矢夏射中當路一人楣又中其二人夏乃奪橋而進乙和先入柵楣到古柵門呼曰可出兵應援且問甲士安在承祐應曰甲士半爲賊所殺半入新柵無兵可出速入柵以圖生楣曰何謂入柵還與夏逆賊賊羣至夏等亦爲所逐令軍士盡入古柵夏背城門楣立城上俱發片箭四五賊稍却圍新柵適青州代戍兵二百騎至賊望見以謂援兵解圍而去是暮遣四騎覘賊三騎爲賊所擄一騎僅脫還言賊去兩柵未十里休兵乃退夏等又言賊退之後循視死者有一婦人挾兩兒於腋而死賊圍城指天指地撫膺痛哭曰有罪者可殺如婦人小兒有何罪乎雖擄去以爲僕妾可矣又言郭承祐等三將皆中矢來臥一柵似爲不祥夏又啓去四月兀良哈等來侵慶源阿吾知軍士戰亡者八十九人馬被奪者一百二十四匹失鐵甲二十四部掩心六十部紙甲十八部鐵冑六十七帛冑四十七鐵護項十

三槍九十七柄長刀二十柄角弓六十三丁加達箭二千六百餘枚雄丘甫乙加退兩道入侵殺男女十二人牛二隻馬十三匹擒男女十二名牛二十隻金承霖亦啓五月十五日兀良哈寇龍城殺害男女二十四名馬二匹擒男女六十九名馬五十七匹牛六十九頭烽卒三名覘騎三人亦皆爲賊所殺

十年六月

丙申朔（戊戌）○以柳廷顯判恭安府事兼判義勇巡禁司事仍命爲東北面都宣撫處置使金南秀吉州道都安撫察理使河敬復慶源兵馬使崔閏德鏡城兵馬使金加勿爲護軍賜廷顯斧鉞教書以遣之教曰邊鎮國之保障豈敢致爲憑陵相臣君之股肱茲令得專處置蠢爾小醜敢肆頑兇犯我封疆以致城邑失守士民流亡而將臣率臣不卽捕獲安集一方搔動者已經數月尙未有成效予茲軫

心思欲得人往行賞罰疇咨在庭咸曰卿哉惟卿秉心堅確威聲夙著命卿爲東北面都宣撫處置使將士如有攻守有違者守令如有安集未至者嘉善以上監囚申請通政以下舉律直斷於戲非威無以制敵非惠無以輯民惟威惟惠用集厥功

○議政府啓曰東北面都巡問使林整爲一道之主司賞罰之權諸將屢敗坐視不恤不能申問科罪察理使延嗣宗身爲主將慶源之役郭承祐敗軍而退屯兵不救龍城之役諸將敗北乃托以方物封裏退駐吉州郭承祐初守慶源不度賊之多少輕敵失律衣甲槍劍盡爲賊有使賊勢益熾又不能固守城子乘舟逃命龍城之戰畏懶不出固已甚矣及尹夏朴楮以孤軍赴敵扣柵急呼出軍與戰非徒不能反高聲叫號甲士盡死無出戰者眩惑衆聽罪不容誅安乙貴與承祐同罪盧原湜多率禁兵不能禦敵先走入柵及尹夏等赴敵

又不出助金成魏臣忠爲左右翼亦皆先潰請皆依律論罪又密啓曰上項人等罪當死惟嗣宗功臣請免其罪乙貴爲承祐副將稍輕於承祐決杖一百散軍防禦可也金成雖無實績有驅城中軍出戰之名又有管下殺敵之名可貸其罪上曰且皆勿殺以待後日樹功可也及廷顯辭召入內殿親授指畫因以是啓授之且命延嗣宗都鎮撫命依軍法施行而不知其爲誰後上乃知爲前忠州牧使李中培命議政府曰是人平日處心不奸從事惟勤誠可惜也亟遣知印李道諭廷顯勿殺廷顯至吉州鎖延嗣宗使平浦驛丞押送于京翼日廷顯還至青州嗣宗猶不發遂杖驛丞五十

○成石璘等啓曰前日命金承暉入慶源古城以守陵室承暉必多率軍士以入慶源賊若來侵鏡城必不及回兵救之鏡城之戍益危但慶源陵室所在不可不戍臣等未能定計趙英茂啓曰臣愚以謂

童猛哥帖木兒平日厚蒙上恩不至於侵凌之已甚豈向殿下祖宗之陵室肆其惡乎且水路不平運糧尤難上曰前日余已遣人省視陵室其人若既省視而來則承運宜屯留鏡城若以路塞不敢入者則承運當領全軍入慶源留十數日若將久居其地者犯夜遣人審賊所向而來可也然此謀慎勿洩於軍中若使彼賊知之是履睡虎之尾也未幾承運馳啓曰臣遣郎將龍彥往審二陵守陵人戶及碑石皆依舊

〔參〕丙申朔〔戊戌〕○尹思修啓曰赴征甲士皆令散軍防禦則心鋒摧折姑使傳教曰汝等皆禁軍予嘗謂汝爲爪牙顧今爾罪當誅死後日樹功則免汝罪云爾則皆盡心克敵矣上曰諸將之罪政府欲殺之予則欲生之至於甲士則予欲罪之政府欲釋之何賞罰有異歟此等嘗爲禁軍當盡力克敵今皆先走豈可復以爲禁兵乎予之令散軍防禦者爲此也思修復啓曰諸將爲首罪當死甲士則率行者盧原湜當首罪矣且處置使必

將以輕重科斷矣其中稍輕者寬之可也

丙申朔〔戊戌〕○議政府啓兀狄哈所乙好之妻寶背率其夫之奴來投萬戶安天儉家天儉之子安壽取寶背鞍馬錢物殺其奴以滅口遂奸寶背按律安壽宜斬寶背宜絞然臨敵之時難得一猛卒姑釋而命之曰汝若赴敵樹功則可以免罪不爾則斬如何上許之己亥○司諫院上疏請延嗣宗郭承祐盧原湜罪疏略曰嗣宗當賊入慶源之時退舍三日之程又侵鏡城退在吉州一不與戰承祐以輕敵敗後乃退縮不戰原湜率禁兵赴征不戰而走罪皆大矣請論其罪以懲後來上曰疏義善矣予將面命之

○庚子下尹夏朴楣于巡禁司議政府啓曰夏之奉使東北面也察戰亡人數與接戰能否其可殺者監囚申請輕者杖之夏既受命而行一不施行且龍城戰時事亦不致察論罪又有待夏之還聞變處

置之命而遲留幾一月朴楣則令往豆稱介居處授以賞賜物件觀變而來楣乃以塞路未去遂傳賜物于察理使而來臣等未知於上前已啓達否若於都堂則既不親告又無呈狀夏楣二人俱失委任之意請下獄鞫問以爲後鑑從之

〔參〕○辛丑^上以趙秩爲東北面都巡問使金乙和吉州道都安撫察理使

甲寅〔丙辰〕○柳廷顯誅東北面鎮撫王庭牌頭崔哲生庭以慶源鎮撫敗軍棄城乘舟入海以致軍民流亡哲生以鏡城牌頭龍城之戰先走惑衆故也郭承祐以下決杖一百散軍防禦廷顯密啓曰東北面旣困戰伐之數又苦使命之繁上議諸政府乃召廷顯還

〔參〕○己未平浦驛丞以延嗣宗至京命解其鎖置于其家

〔參〕辛酉○議政府啓停東北面赴防甲士公廩啓曰甲士百二十五人臨敵先潰無一人盡心樹功以報卵翼之恩者今柳廷顯旣不科罪彼賊亦且

不來但以禁兵之故并其僕從二百五十人常費公廩甚爲未便此輩家在其道與戍兵無異乞使之自備從之

〔參〕乙丑○司諫院上疏請延嗣宗郭承祐盧原湜罪疏曰將帥人主之干城生民之司命國之安危係焉受命之日有死之心無生之計成功則賞之敗績則罰之此古今之常典也今吉州道察理使延嗣宗起自寒微位至將相殿下之賜大矣固當盡心竭力以禦外侮下不負爲臣之節上不負殿下之恩不此之顧山戎敗我邊兵者至再而一不與戰退舍三日之程以爲自安之計罪莫大焉慶源府使郭承祐曾無才功專以武才長享厚祿今以禦敵增秩遣之此固爲殿下盡力致身之時也前以輕舉見敗於敵後乃棄城遠遁不戰助戰兵馬使盧原湜率兵入城臨敵不戰是皆不赦之罪也臣等聞傳曰有功不賞有罪不罰雖唐虞不能以化天下又六典曰失一城堡亡一州縣軍法從事況慶源陵寢所在非他郡比乎願殿下將嗣宗承祐原湜等依法施行以戒後來疏留中

太宗實錄 卷二十

十年七月

○丙子遣平壤君趙大臨參知議政府事尹思修如北京韓尙敬到遼東欽錄五月二十日頒降詔書以送詔曰自元祚旣終四海鼎沸天命我太祖高皇帝統一華夷普天率土靡不臣妾惟胡寇遺孽分竄沙漠齾齾偷生殺戮易置有如反掌朕承大統撫治寰區志在安民惟懷不及盡心殫慮以求其寧凡居覆燾之中舉納甄陶之內獨此殘胡騁兇梗化屢使撫循輒見拘殺往者邊將獲其部屬念其有父母妻子盡釋還鄉遣使送之彼禦性不移復殺信使積匿恣虐益肆寇攘怨懟神人實天所殛遏虐之旅以慰僭蘇遂親率六軍往征之用拯顛連綏寧降附五月十三日師至斡難河遇胡寇本雅失里

來戰卽摧敗之追奔逐北電掃霆驅本雅失里奔命不暇以七騎奔遁獲馬駝牛羔生口無算其餘降附者相繼而至遂撫安之給與羊馬糧廩令各安生業數百年之枿芽一旦蕩除千萬里之腥膻由茲洒滌乃封于山川振旅班師於虜包舉無外弘施一視之仁撫輯有方永樂萬年之治乃遣大臨等奉表箋進賀

〔參〕丁丑○流吏曹正郎朴熙中于順天府禮曹正郎崔進誠于靈巖郡皆收職牒司譯院副使崔雲外方付處柳謙回自北京言熙中進誠以點馬別監到義州點送易換馬匹循義州等處軍民之欲擅以進獻馬之良者易換軍民之駑馬而解送雲以押送官赴遼東亦以一匹換給義州百戶至都司爲一旗軍所覺賂而得免事下巡禁司覈實熙中所換二十四匹進誠所換二十二匹計贓當斬雲計贓杖八十徒二年上皆命從輕施行

○戊寅金同介以骨看兀狄哈指揮豆稱介等七人來命內臣饋之

于西上廂豆稱介等皆獻土物

辛巳○豆稱介等復詣闕命饋于西上廂

壬午〔甲申〕○流前吉州道察理使延嗣宗于咸州大司憲黃喜等上言曰前吉州察理使延嗣宗職專方面以制敵討賊爲任者也往者野人侵邊境而殺守臣再肆陸梁圍逼慶源勢將陷沒爲嗣宗者當倍日兼行進兵討之曾不爲慮托辭逗遛圖存性命其於見危授命之義何如況慶源陵寢所在尤不可不重也雖不及救援及賊退之後亦當以重兵臨之宣示威信鎮安民心可也退駐鏡城終不進兵使賊勢益張其於忠君愛國之道又安在哉慶源見圍則逗遛鏡城不卽救援龍城見侵則退駐吉州以避賊鋒是宜明置於法殿下特以勳臣之故置而不問賞罰失中臣等所以痛心者也請明正其罪以懲後來前慶源兵馬使郭承祐職當重藩賊來則守死力戰以

全城邑職也顧乃棄入海島先示懦弱以撓民心使民望風奔潰糧儲器械爲賊所掠慶源一邑蕭然爲墟至於陵寢無人守之承祐之罪死有餘辜而今乃置之寬典賞罰亦可謂不中矣伏惟殿下明置於法以垂後來人臣之戒乃命嗣宗付處承祐勿論喜等復言承祐之伐野人濫殺婦人嬰孩又有貪婪之行雖不置於法收其職牒家財沒官可矣上曰此人已杖一百散軍防禦足以當其罪矣自今毋得再請

○丙戌豆稱介等詣闕辭上曰汝等不憚道途之險慕義而來予欲親見適不豫而未果汝等宜好去賜衣冠厚慰而遣之豆稱介請留子弟三人備守衛許之

丙戌○吾都里千戶張權子等五人來朝啓曰臣等未嘗與謀作賊

十年八月

○乙未朔以完城君李之崇星山君李稷爲東北面遷陵使以中軍都總制李和英爲遷陵侍衛使又命東北面都體察使都巡問使以兵衛之上欲因遷陵之役以襲野人政府固諫曰山水艱險待冰合之時圖之未晚乃遣護軍田興于猛哥帖木兒部以覘之

〔參〕○丙午命除慶源府月課軍器東北面都巡問使啓慶源府方五六月大旱禾穀盡枯且多瘟疫或有合家皆死者請除月課進上軍器專爲養民防禦從之

〔參〕○庚申停朝市三日以是日啓穆祖之陵也

〔參〕壬戌○命議德安二陵改葬之制河崙成石磷趙英茂以謂作雙墳以示考妣摯而有別之義李叔蕃以謂同葬一穴內置灰隔外作一陵於禮亦當上曰二說不同更議以聞

十年九月

○丁卯韓尙敬回自北京啓曰帝御奉天門早朝宣問高麗北門上不知甚麼人來搶人口尙敬等具奏其故且奏本國差李玄朴惇之二次來奏適以大駕北巡玄已還國惇之欲啓于東宮如南京帝曰朕不曾見爾國文書這兀良哈真箇這般無禮我調遼東軍馬去你
也調軍馬來把這厮殺得乾淨了帝又謂通事元閱生曰這野人受朝廷重賞大職賜以金帶銀帶招安如此忘了我恩打海青去底指揮拿做奴婢使喚又嘗一來擾我邊有恩的尙或如是你莫說了料著你那裏十箇人敵他一箇人要殺乾淨閱生奏曰未蒙明降不敢下手帝曰這已後還這般無禮不要饒了再後不來打攪兩箇和親又帝御奉天門宣諭曰這野人貌雖似人實懷熊狼虎豹之心可著好軍馬一舉殺了其中若有歸順朝廷的人不要惹他又來告難決斷

辛未〇命東北面都巡問使歸所擄兀良哈婦女
乙亥〇中軍護軍田興回自兀良哈地面

〇遣司譯院副使崔雲管押摠旗金帖木兒如遼東咨曰田興到建州衛有東寧衛摠旗金帖木兒出來相見告稱永樂六年欽奉聖旨招諭野人亥狄乃等爲緣亥狄乃等托故不曾赴京却來建州衛住留幸蒙護軍出來朝鮮既與朝廷是一家願隨護軍同赴朝鮮國回還京師興聽此就引帖木兒同來看詳帖木兒既係朝廷差遣摠旗理合差人伴送回還

〔參〕〇丙戌遷陵都監啓德安陵遷葬之制〔中略〕上從之

十年十月

壬寅〔甲辰〕〇內史太監田嘉禾少監海壽奉勅書來上率百官迎至敬德宮勅曰胡運已終天命已去朕皇考太祖高皇帝膺受天命

統一華夷朕荷上天眷顧平定內難紹承大統四方萬國靡不臣順獨殘胡餘孽梗化不庭拘戮信使朕親率六師往討其罪爾獻馬萬匹以資國用眷爾忠誠深用嘉獎今特遣正使太監田嘉禾副使少監海壽以彩帑銀兩馬匹賜爾爾其體朕至懷苧絲二百匹線羅二百匹彩絹五百匹銀一千兩馬八匹上受賜謝恩訖至〔大〕平館設宴嘉禾又示禮部咨咨曰奉聖旨朝鮮國王進過馬一萬匹恁禮部兵部便定了價運將去遼東都司收貯行文書與國王差人來領欽此每匹給絹三匹緜布二匹共該絹三萬匹綿布二萬匹分賜段子羅絹于宗親議政府義興府代言臺諫及近臣有差議政府啓馬價將至請辭之以露忠心上曰天子有賜則當受不可曲意露誠且以此援例則必有後日之患矣議遂寢

〔參〕己未〇停朝三日以德安陵遷葬也

〔參〕○辛酉遷德安二陵合葬于咸州韃鞨洞之原洞在咸州北五十里葬用灰隔德陵在西安陵在東啓陵以八月庚申即日發引九月到咸州安于殯殿至是乃葬

十年十一月

癸亥朔○遣吏曹參議趙源如遼東取領馬價也

癸酉〔乙亥〕○時民有潛往吾都里地面者有司欲當以謀背本國之律上曰此雖本國之民然嘗與兀良哈共處者也豈宜遽殺屬于南州官賤可也

庚寅○兀良哈五人來

十年十二月

○辛酉吾都里指揮童猛哥帖木兒遣使獻禮物

太宗實錄 卷二十一

十一年正月

壬戌朔〔甲子〕○吾都里指揮童猛哥帖木兒使人獻熊鹿皮各一張

〔參〕丙寅○司諫院上疏請免郭承祐職疏曰賞罰國之大柄賞一人而千萬人勸罰一人而千萬人懼然則一賞一罰誠不可不慎也右軍同知摠制郭承祐頑忍薄行反覆不忠人也始事昭悼謀動干戈又從懷安以肆強暴一國臣民所共憤懣殿下優容不即加誅累增顯秩恩至渥也爲承祐者忘身徇國以報殿下罔極之恩職也一受邊寄以禦山戎行師失律爲敵所敗又值來寇斂兵不戰棄城逃遁遂使先王陵寢之地陷爲賊藪承祐之罪在所不宥殿下尙寬鈇鉞之誅薄施末減之刑舉國臣民倍增痛

心曾不踰年擢置樞府臣等未審殿下以承祐爲有功乎爲有忠乎爲有智勇乎其所管王庭崔哲生旣已伏罪承祐獨保首領又蒙寵渥其於用刑行賞之義何如臣等竊恐後世之守邊寄者將自此而無所勸懲矣且當盛朝忠臣義士不爲不多今以覆軍陷城之人爲摠制之任未可也伏望殿下還收教命以戒後來上覽疏不悅〔下略〕

○庚午遣大護軍朴楣于童猛哥帖木兒令還所掠人口牛馬也
庚午〔壬申〕○賜吾都里人衣一襲吾都里將還也

〔參〕○辛巳議政府請以進獻馬價羨餘充國用先是進獻馬一萬匹價上國皆以絹子縣布送之皆令分給馬主其羨餘絹一萬六千匹命以一萬四千匹分納于內資內瞻寺濟用監若以兩寺爲內帑則全納濟用監其餘二千匹聽民貿易皆用楮貨

辛巳○命以下番甲士三百侍衛軍三百濟鏡城之師東北面監司上言野人來言猛哥帖木兒將徙于深處恐乘其時侵掠益兵以禦

何如上曰野人按堵我發兵以屯彼必生疑不如待之以靜議政府上言鏡城戍卒本六百人又以番下〔下番力〕甲士侍衛軍等戍之則內實完繕而虜亦不敢動矣從之趙英茂李天祐進言曰今猛哥帖木兒雖令招撫今將移徙于開元路恐與種類以間道直向吉州則鏡城如囊中之物又牧馬南下則端青之地騷然矣又訴上國曰朝鮮殺我族類故棄土而來永興以北在元朝直隸中國宜削其地則上國信之若令納土則甚爲未便宜先遣兵自甲州直抵阿赤郎口又以兵分入其境則必爲我擒矣假使復生懼不敢動上曰未可知也賊雖入吾土若知我情則難獲矣況邈在異土地之遠近險阻未易知也雖爲我擒後必有患況未可必乎上國曾納東北十處人民遣金瞻以辨之不於此時削地矣其將聽猛哥之訴而令納我土乎星山君李稷自漢京來亦善謀者也盍咨焉旣而稷至啓曰道遠地險不可

動衆況北方年飢馬困不如來則擊之去則勿追也上笑曰已知之矣

十一年二月

丙申○賜童猛哥帖木兒穀百五十石初大護軍朴楮至自野人曰野人甚飢猛哥帖木兒云國家若給糧餉不敢離散否則皆爲盜矣政府上言野人甚飢運米給之何如上曰楮之往專以救飢也何謂何如宜直賜之

○東北面都巡問使申報猛哥帖木兒之弟沙介來云胡刺溫兀狄哈將與他野人來侵又云猛哥往中國則吾當來附上曰果合吾言此輩宜深撫之若來附則佯納之

○丁巳對馬島宗貞茂使人及兀良哈毛憐衛人等來獻土物

十一年三月

壬申○兀良哈童於虛出率子來朝

庚寅○罷慶源鎮慶源嘗爲北戎所敗且德安二陵遷于咸州其兵馬使河敬復獨留無與守者命敬復還遂罷其鎮

十一年四月

○乙巳遣人于遼東易換供祭犧羊

丙辰○東北面吾音會童猛哥帖木兒徙于開元路吾音會兀良哈地名也猛哥帖木兒嘗侵慶源畏其見伐徙于鳳州鳳州卽開元金於虛出所居於虛出卽帝三后之父也

十一年五月

丙寅○遣知印及前護軍金同介于東北面東北面都巡問使報吾音會指揮李好心波來云北戎之變難測宜整軍旅以備不虞上慮水兀狄哈與他野人相結遣人招撫之且觀其變同介水兀狄哈之

種也

十一年六月

癸卯（乙巳）○議政府上言曰東北面都巡問使金承暉報吾都里兀良哈兀狄哈等近因飢饉絡繹數來每求鹽糧欲與之則難繼不與則必生邊釁請糶米若干以荅求望之心臣等得此深欲殄滅然未敢輕舉若不聽所求則患在不測請從之上曰出米三十石令鏡城兵馬使每於野人往來擗節均給

○己酉賀聖節使張思靖回自京師啓曰義州民八口將馬五匹投于遼東思靖請令還本都司不聽命移咨遼東請還之

〔參〕○辛亥以甲士韓仲謙等充鏡城戍卒仲謙等擊申聞鼓自陳前年與野人戰而有勞以求陞職命下獄以訊

太宗實錄 卷二十二

十一年七月

甲子○兀良哈崔古時帖木兒等四人來獻禮物

○癸酉賜兀良哈十二人衣靴告還也

乙亥（丁丑）○骨看兀狄哈來

十一年八月

〔參〕甲午○以右軍同知摠制崔閏德爲鏡城等處都兵馬使

十一年九月

〔參〕甲申○議政府請尹夏朴楣之罪啓曰前年五月十五日東北面龍城之戰敬差官尹夏朴楣等第其軍官功績來告賞職今聞楣等以無功者并錄啓聞願將楣等以其時慶源節制使郭承祐一處憑考以正朦朧之罪

從之

十一年十月

丙申(己亥)○西北面都巡問使柳廷顯上書請義州節制使禹博罪書曰博報云迎黃天使遼東指揮方俊生以生絹十五匹見贈博拒之三日不獲已受之以鹿皮十張八升布二匹回荅今將絹匹完封送納臣竊謂爲博計者不受可也俊生之贈過多不能固辭乃以皮布荅之似乎買賣不惟士風不美有乖邊將守禦之意願將博按律罪之命勿論

十一年十一月

〔參〕壬戌○釋大護軍朴楣囚前此兀良哈侵邊郭承祐敗績遣楣往審適有賊來楣亦赴戰錄其軍卒功過以聞政府啓楣錄功不以實宜問情由是日巡禁司具獄辭以聞上曰劔戟間誰能辨之不可強推姑置之

○乙亥兀良哈崔沙顏不花等三人來獻土物

〔參〕癸未○賜鏡城都兵馬使崔閏德藥閏閏德有疾也

十一年十二月

辛丑(癸卯)○吾都里千戶崔於夫介馬大愁等二人獻驄馬

丁未(庚戌)○兀良哈甫乙看指揮甫乙吾指揮遣人來朝

十一年閏十二月

〔參〕戊午(庚申)○禮曹啓請習蒙學啓曰司譯院職在事大交隣今蒙學訓導者才二人習者又少宜擇五部學中聰慧者三十人以習其語其樂音又將廢墜令慣習都監并(肄力)隸習之以備交隣命政府議之

庚申○兀良哈指揮者容可等十四人來獻土物

○乙丑兀良哈千戶也吾可等來獻土物

己巳○吾都里指揮童多音波老等九人來獻土物

甲戌○骨看兀狄哈達賓介等來獻土物
○戊寅建州衛吾都里人來獻土物

太宗實錄 卷二十三

十二年正月

戊子○悅難衛骨看兀狄哈達賓介等及建州衛兀良哈甫多豆等
還
○壬辰建州衛吾都里崔好吾大等二人及指揮童多音波老等八
人還
辛丑○建州衛吾都里金希周等告還
壬寅○命召肅州人申得財得財善造紙絕類中國紙樣故召之優
賜衣食令人傳習且傳旨西北面賜其母米五石復其妹夫軍役以
養其母
○癸卯下義州牧使禹博于巡禁司贖杖六十初兵曹判書黃喜回

自京師上言本國人賣馬于彼土者以千數西北面敬差官曹致又啓曰遼東指揮方俊嘗欲買馬先賂於博博受之後遼人入我疆買馬千餘匹以還博伴不禁請罪之上曰果若是歟博不得辭其罪矣令巡禁司鞫問博以不知荅之巡禁司請博專制方面不堪其任之罪政府上言東西北二面地連他境其民間馬匹皆著火印毋令私賣從之

〔參〕癸卯○宥外方罪人_中江原道金化水軍定屬韃韃趙金_中等京外從便

十二年二月

戊午○賜檢校漢城尹崔也吾乃苧麻細布各一匹靴笠各一事以向化也

〔參〕己巳○_上略_上以河敬復爲鏡城等處兵馬節制使_下略

庚午〔壬申〕○_上略_上〔議政府〕又啓東西兩界之民毋得與境外之人

賣牛馬曾有著令無識之民暗行買賣自今犯者及官吏與把截人知而故縱者通同做賣者隱匿不告者乞重刑鑑後皆從之

十二年三月

庚寅○建州衛吾都里人日本無羅加多人等來獻土物

癸巳○建州衛指揮童於虛周及童所羅等來獻土物

十二年四月

丁巳○立西北面路引法議政府上言西北面都巡問使報遼東軍人到鴨綠江本國人民將牛馬放賣已有條禁故道內編戶牛馬烙印付籍以憑考察尙憂他道人民因父母族親相見往來買賣無憑可考自今皆受所在官司文憑所賣物貨一一施行以爲路引來付都巡問使置簿傳錄仍於本文背書印押其無文憑者比擬境外人相和買賣條論罪本府議得京中留後司兩界往來者如呈施行兩

界之民自相往來者亦依上例施行其無路引者杖八十所賣物沒官告者充賞從之

〔參〕○庚申命還給品米戶米歲己丑慮上國與北胡連兵禍延于我故令各

品出米有差以備軍餉〔下略〕

○丙子兀良哈豆叱加茂等二人來朝

太宗實錄 卷二十四

十二年七月

壬辰〔丙申〕○賜申得財米及緜布得財遼人也造華紙以進下鑄字所印十七史賜得財米五石綿布三匹令紙工傳習

十二年十月

戊辰○遣司譯院判官姜庾卿押送李哲等十二口如遼東西北面都巡問使林整報云遼東人李哲金禾等率父母妻子弟姪共十二口到昌城境內曰困於韃韃之戍且被土官侵漁又七月霜降生理甚難亡命而來政府獻議我朝誠心事大豈宜容納逋逃義當速還上曰若以其言具錄移咨則以外國知中國之變實有嫌焉直以思戀本土移咨悉令遣還可也哲等本我西北面人也

十二年十一月

辛卯（甲午）○宗貞茂使人及兀良哈等來獻土宜

丁酉（庚子）○建州衛吾都里千戶童甫知白顏豆百戶多龍介及骨看兀狄哈阿吾實等來獻土宜

〔參〕壬寅（甲辰）○命還給永興府東西班科田之稅歲己丑以備軍餉公收至是給之

十二年十二月

辛酉○骨看兀狄哈建州衛吾都里來獻土宜

○丙寅給吾都里指揮李好心波糧米東北面都巡問使報李好心波等十七人告狀他人等皆入中原予等十七家獨留生理甚難故也

太宗實錄 卷二十五

十三年正月

癸未○吾都里兀良哈等來獻土物

○壬辰吾都里指揮李好心波等來獻土物

丙申○議政府上待兀狄哈兀良哈吾都里等使送人之法政府啓兀狄哈等使送人絡繹往來其弊不小自今領十餘戶以上者使送人外勿許赴京皆於吉州鏡城等處優待還送從之

○丁未遣刑曹判書崔迤如京師賀聖節也唐人葉官生嘗於永樂四年爲倭所擄逃至金海至是國家將送于京師官生不欲曰軍器別軍十七人皆前日漫散軍也非獨此也西北豐海兩道如予者頗多予若還京則必告無遺矣政府以聞遂寢

十三年二月

〔參〕戊寅○宥東北面充軍童之老童安馬巨全羅道金三省徐生吉西北面李奉

十三年三月

壬午○命蠲東北面慶源民七十五人所貸之粟民告曰失土來寓鏡城請減庚寅辛卯兩年所貸之粟都巡問使以報從之

○己亥〔略上〕參贊議政府事金承暉又上言曰竊念今春和草長恐北狄窺覘邊塞乞遣人于江界慶源以北無人之處潛隱草莽探候有無以備不虞何如上曰議于政丞從宜施行

壬寅○命朝廷使臣護送軍除牛馬外十升以下苧麻布人參皮物許行貿易從西北面都巡問使之報也

十三年四月

己巳○遣還逃軍高中金康吉等于遼東

十三年六月

〔參〕○丙辰賜童安老鄉東北面端州安老乃右軍都摠制李和英妻父也

○丙寅遣還登州衛水軍盧苗等三人于遼東苗等遭風敗船到鴨綠江西北面都巡問使以報命給衣服以遣之

○庚午建州衛指揮童風只來獻土物

太宗實錄 卷二十六

十三年七月

丙戌○議待兀良哈東北面都巡問使報於伊寬源洞朱乙溫源洞吾村源洞等三路乃元朝時所通路也今兀良哈數人自吾村源洞來若使出入三路則賊謀可畏難於應變自今由此三路者皆以賊待之下政府擬議政府請如所報從之

○乙未吉川君權跬知議政府事呂稱等回自北京啓曰皇帝賜宴厚慰賜跬廐馬三匹段絹各八匹又聞闕內宦官之言曰帝將親征匈奴發天下兵百萬餘人已送上都又有遼東人奏於帝曰濟州馬匹前元所放也請移置于中國成石璘啓曰臣向啓濟州馬匹宜刷出放于近島況今聞飛語如此乎上然之又啓曰權永均亦聞諸本

朝宦官尹鳳曰造戰艦三千將攻日本大臣皆懼獻計曰東西二界宜遣武臣預鍊士卒上止之曰卿等勿疑曩者帝與日本和親羣臣皆曰當與日本共侵于我我固曰無之不其有驗乎今者帝之待永均無異(乎力)昔其征北巡遼固其境內之事耳豈有意於我乎

○丙申以崔迺爲西北面都巡問使兼平壤府尹延嗣宗東北面都巡問使兼永興府尹金承靈西北面兵馬都節制使兼判安州牧事李從茂東北面兵馬都節制使兼判吉州牧事曹備衡尙州晉州道尹坤雞林安東道馬天牧全羅道曹(洽力)怡豐海道朴矩江原道皆爲兵馬都節制使河崙趙英茂李天祐李叔蕃等進言曰帝固無心於我矣若胡人漫散則東有混同江西有萬里長城故必南奔於我矣無備可乎上曰是則然矣予聞古有契丹紅軍本非指我卒見其禍若以此圖之則可也不必曲生疑也且我以誠事大何疑之有武備有

國之常宜遣武臣于外也故有是命

〔參〕○癸卯左政丞河崙等詣闕請見上曰旱乾之際又有東風傷穀故憂勞不寐且汗出難於延見崙曰今聞上國將北征又遣人于東北野人雖與我國和親終或圖我未可知也且恐窮兵亡入我疆方是時何不見臣等而議之體若未寧宜引見臥內上曰防邊之策選將帥儲糗糧鍊兵器三者而已更有何計耶帝之征東征北自家之事不必爲慮且予方許遣武臣備禦卿等不必面請也今東西二界有旱乾之變蟲蝗之災諸卿在燮理之職不此之憂而以中國爲慮乎崙對曰此雖可憂亦常事耳他國之兵若或猝至蒼黃之際固難制禦退且言曰昔秦交遠國而終滅齊不可徒恃帝之親我也前朝己亥辛丑之間都城不守而有紅賊之變修都城築山城等事或上慮所不及也上聞之曰予雖未能通達古今不服此言矣他日當與諸卿議之翼日上御慶會樓召左右政丞及李天祐李叔蕃笑曰昨卿等築城之議何其惻也事之危急至於守都城則何以爲國凡

物有盛衰帝非父命而自立南征交趾北攻沙漠何暇東顧哉若果有難將舉兵直走耳豈宜守城以待不如堅築平壤義州之城姑置妻子使馳捷音可也僉曰臣等所未計也然前朝紅亂都城不守人皆離散不如深溝高壘收納妻子則民無離心盡力於死然後直走則進退有據矣且與日本同力爲可上曰予亦計之然天不可違帝雖有東征之意予豈敢違天乎當盡心力以事之耳萬一有急勢不得已也不可先事圖之也

〔參〕○甲辰以延嗣宗爲谷山君李原東北面都巡問使李從茂東北面都安撫使兼兵馬都節制使金承靈西北面都安撫使兼兵馬都節制使

〔參〕乙巳○命中外習射片箭上謂金汝知等曰向者令近侍人習射片箭至微難見中則必傷物且遠及二百步攻敵之具莫如此也太祖潛邸時爲編將攻遼城遼人守城者只露其面自下射之多中死者回回達比僉院號爲勇將亦爲所擒皆片箭之力也未知始於何代汝知等考諸山堂考索乃唐武后所制筒射也乃命習之

十三年八月

〔參〕○丁未朔御便殿引見左政丞河崙右政丞趙英茂吏曹判書李天祐兵曹判書李叔蕃崙等啓都城爲國根本義當完固請修治上從之設京城修補都監以星山府院君李稷宜寧府院君南在爲都提調以中軍都摠制金漢老知議政府事朴子青呂稱驪川君閔汝翼參知議政府事沈溫左軍摠制禹希烈仁寧府尹安魯生前都觀察使李貴山爲提調政府啓修築軍調京畿一萬二千忠清道二萬二千慶尙道二萬七千全羅道二萬四千江原道五千豐海道一萬共十萬名速令赴役從之上謂河崙等曰昨卿等欲築都城東西兩隅以廣之吾以爲未便也今有門庭之寇何築之爲太祖建邦設都以召衆怨及至上王巨室咸懷舊都遂還本京逮于我躬又還于此當遷徙之時公私土木之勞詎可勝言往年開川今起長廊又欲築城則民力殫矣予欲休民力卿等其言之崙曰臣謂方今以誠事大固無可虞之事儻或上國之人逃漏闌入則必命將以備之其從

軍者孰無父母妻子哉若父母妻子保于堅壁則人莫有叛心矣且都城國之根本今當無事築之爲宜上曰國家之事予豈忽然今無寇而勞民予不忍爲趙英茂等曰上言是矣請姑停之崙曰事之至當者豈可已乎昔餘古者羅大及契丹之亂前朝以守城得免其禍辛丑紅軍之亂以不守城敗績是固明驗也上曰上國圖我則難矣彼若闌入則一介邊將所能制也豈可引入千里之內以守都城乎事遂寢崙等啓曰希烈曰國家有變殿下上馬則必令將帥守都城不可不改築此言誠有理宜令各司議其可否若皆可之則雖用民力怨在于下上曰圖國者予與二三大臣耳豈可問於各司哉以予所料今冬必無守城之事矣若有逃軍則當擊之境上豈有馬上之慮事在不獲已則宜埃春和不傷民命

〔參〕戊申○以吏曹判書李天祐爲西北面都體察使往視城堡及武備賜弓矢遣中官餞之

己酉○唐人押送官林密回自遼東啓曰韃靼軍向鐵嶺衛遼東有

備

〔參〕壬子○罷革東北面千戶等私役管下民戶政府啓東北面來接向化人千戶金高時帖木兒管下李求大崔也吾乃管下金良龍等七人告曰昔在元朝各以毛物鷹子貢于帝所今者慕義來居千戶等役之如奴隸不堪其苦願依他軍例役之臣等以爲此人等歸化有年不可不從其願宜將上項千戶及其他千戶子孫內二品以上給奉足十名四品以上五名六品以上四名百姓正軍則給二名以爲式從之女直遺種祖先稱爲伊彥千戶百戶投附元朝稱其所部爲管下百姓自我開國以後慕義向化年紀已久因循役使多占者以百數又東北面土豪私占百姓如奴隸父子相傳爲弊甚鉅雖在王室亦以良民號爲家別抄上深知其不可於辛卯年盡去家別抄爲官軍宗室皆觀感而革之唯都摠制李和英之蘭之子也尙不革去至是召謂之曰東北面良民旣爲公役又爲私役困苦甚矣雖曰世傳義實未安故自桓王以前所占別抄予旣革之予亦豈無子

孫計哉但法有不可耳國家常欲革之予以卿爲難之然卿必以王室爲心豈以此爲念哉且今上國有變宜以其民屬於官軍予無內外心卿豈有疑然卿有老母在於東北不可無民民之可役者悉以名聞予將下旨以屬于卿和英曰臣之所役將五十人矣臣不賴此尙可得生但有老母在耳父之未死尙不居京況今耄矣安敢來京上慮臣老母冒法給民臣雖頑愚敢不知感檢校漢城尹朱仁姜具亦東北面多占良民者也慮上國有變則勢與野人相通乃召之

〔參〕○癸丑以星山府院君李稷爲東北面都體察使往視武備及城柵稷辭上曰李和英有功於社稷非他人比也其管下百姓五十名雖非政府詳定之數當從其請隨宜給之稷對曰歸化良民宜屬官軍然和英崔也吾乃等今姑存之以寬其心上從之曰凡所布置惟卿是從賜弓矢命中官餞東郊

辛未○遣知司譯院事康邦祐押送錢得輿鄭良旭等四人于遼東

得輿等上國寧波府民也嘗被倭擄今逃至慶尙道固城乃遣之
十三年九月

丙申○命司譯院舍人林義押送廣東海南衛崖州人劉官保妻等
二名于遼東官保等嘗爲倭擄棄於海島庇仁縣人見而收來忠清
道觀察使以報也

十三年十月

丁巳○賀千秋使趙秩回自京師啓曰金山達達使其妹朝貢獻馬
千匹

壬戌○刑曹請泥城節制使金字罪宇率軍士獵于異土且以官中
人參貿易上國之物以資私用其父未死而求賻紙燭于諸郡請罪
之命勿論以功臣也略下

略上〔參〕○戊辰略上〔以李原爲〕永吉道都巡問察理使崔迺平安道都巡問察理使

略中〔李從茂永吉道都安撫使金承暉平安道都安撫使〕略下

十三年十一月

○戊寅還宮奉上王設宴于松溪院盡歡夜還兀良哈李都乙赤亦
侍從因醉以刃刺蓋陪一人

己卯○女眞子弟四十二人來賜米豆人各五石

乙酉○建州衛千戶金希珠使人獻土物略下

丁酉○免鏡城李大豆所耕田租從永吉道都巡問使李原之報也
吾都里建州衛千戶金希珠狀告歲在辛卯吉州移來土著耕田乞
免租亦從之

十三年十二月

辛亥一〔癸丑〕○兀良哈千戶八人來獻土物

丁巳○兀良哈千戶加乙多等四人及日本九州節度使使送十人

等來獻土物

○戊辰骨看兀狄哈女真共三人來獻土物議政府啓骨看兀狄哈男女三百餘人來至鏡城地脫若飢饉恐必成羣寇竊請人各米五斗男女并布一匹題給何如從之

甲戌○軍器監設火藥于殿庭逐疫年例也乃令兀良哈與倭使觀之及火矢交發皆驚懼奔走或有燒其衣者

太宗實錄 卷二十七

十四年正月

辛卯（癸巳）○骨看兀狄哈指揮豆稱介時應介等九人來獻土物

〔參〕乙未○以左軍同知摠制金貴寶爲鏡城節制使

○戊戌兀狄哈千戶百戶七人來獻土物

庚子（癸卯）○骨看兀狄哈五人兀狄哈指揮千戶等四人來獻土物

十四年二月

○丙午吾都里千戶骨看兀狄哈建州衛百戶各一人來獻土物

庚戌○兀良哈千戶六人來獻土物永吉道都安撫使李從茂報自鏡城二十五日程羅毛羅住兀良哈指揮阿老管下千戶毛下也進

言曰女直都事也羅介舉中原數多軍人於前年正月云屯隱出來自正月至四月造大船及汲水小船各二百三十艘載軍人泛自松渴江歷愁下江向愁濱江將築巨陽城慶源薰春城實之以吾都里兀良哈上曰此人等每以如此事來告上國之兵雖來豈以船過鐵嶺乎此必虛語也抑或中原邊將造船於此地耳

○丁巳兀良哈千戶馬大愁等四人來獻土物

○癸亥兀良哈三人來獻土物

庚午○兀良哈三人來獻土物

十四年三月

○辛巳吾都里指揮千戶百戶并四人來獻土物

庚寅○遣還僧希清昌淳希田等于遼東平安道都巡問使報遼東僧希清昌淳希田等今到義州曰我等係朝鮮人曾被唐人所擄入

歸父母俱沒故出來政府議得啓此僧等還入送於義不悖上然之遂移咨押送

十四年四月

甲辰朔○吾都里指揮童於虛周等及兀良哈千戶於夫老等還

○癸丑吾都里李好心波等三人還

十四年五月

乙未—(丁酉)○同判議政府事柳廷顯回自北京啓曰皇帝於三月二十七日領兵百萬北征皇子皇孫皆扈從東宮在南京戶部尙書夏原吉留守北京兼摠六部之事北方諸國皆遣使欽問起居

十四年六月

壬寅朔○遣僉知司譯院事裴蘊押送唐人金保奴等三人于遼東嘗被倭虜逃來者也

〔參〕戊申○〔略上〕六曹判書等上言今皇帝北征且歲大旱東西北面兩界糧餉城子宜預蓄修完以備不虞

〔參〕辛酉〔甲子〕○兵曹判書李膺請申吹角之法上曰然是安不忘危之道也又謂膺曰吹角之法卿等當明勅約束以待之吾雖夜半吹之以察勤怠上謂諸卿曰比聞皇帝北征是乃門庭之寇事出不得已耳如向者安南一舉帝之失也自念吾東方土瘠民貧境連上國誠宜盡心事大以保一區如不得免焉則當積穀練兵固守封疆然予竊料帝之遇我甚厚且南征北伐固無寧歲第恐疲戰之民逸入我疆如辛丑之沙關耳李稷曰永吉平安二界糧餉不贍曾有旨移慶尙之粟於江原江原之粟於永吉又移豐海之粟於平壤而或作或輟不見實效甚非計也且二界山城宜埃農隙修築從之

太宗實錄 卷二十八

十四年八月

〔參〕乙巳〔丁未〕○光祿卿權永均鴻臚卿任添年少卿崔得霏李茂昌赴京師以帝北征欽問起居也呂幹從之

癸丑〔乙卯〕○下旨于永吉道都巡問使一吉州以南軍馬因赴鎮鏡城道阻困踣將來可慮宜以吉州北村牛禾嶺爲界移隸鏡城以其軍馬防禦安邊以北軍馬則宜令精鍊器械番上宿衛一兀良哈吾都里兀狄哈等假辭進上往來不絕給驛馬則便欲攘奪多方劫之馬主疑其被殺棄馬遁避此積年巨弊也自今臨時應變不許給馬

十四年九月

○丙戌吾都里千戶一人來獻土物及鷹一連

○己丑略上通事元閔生回自京師啓曰六月初四日皇帝親征平定北方至八月初一日下輦于北京布告天下仍進傳寫詔書其文曰奉天承運皇帝詔曰朕祇奉天命撫馭華夷惟欲乂安咸得其所瓦刺黠虜僻在窮荒與其醜類歲相攻殺敗亡喪沒存者無幾朕卽位之初撫摩存恤授以封爵數年以來憑仗朝廷始得休息烏合爲羣卽復驕恣辜德負恩背違信義擅自弑立執殺使臣侵擾邊境犬豕豺狼貪欲無厭覬覦自大朕不得已躬率六軍以討之至撒里怯兒之地賊兵來迎戰一鼓而敗之追至土刺河賊首答里巴馬哈木大平把秃孛羅不度智能掃境而來兵刃才交如摧枯振朽追奔逐北殺戮其名王以下數千人斬馘無算餘虜宵遁遂班師而還歸至飲馬河和寧王阿魯台遣其酋長率衆詣軍門來推誠待納以安反側

勞來撫輯令回部落嗚呼奉行天威掃腥膻於絕塞綏寧順附覃恩惠於遠人俾中國靡轉輸之勞邊境無峯火之警故茲詔示咸使聞

知略下

己丑略辛卯○閔生又啓曰帝還京將赴征時逃軍及從征軍士之妻妾奸他夫者每日親決斬首於闕門外數至百餘又遼東人皆云王師與北人交兵北人伏奇兵佯敗而走王師深入奇兵絕其後圍數重帝以火藥突圍而出倍日而還

十四年閏九月

○庚申領議政府事河崙等欲進箋賀甘露命止之略中上聞百官欲奉箋陳賀召禮官傳旨曰當夏月旱暵之時奔走禱賽之不暇雖降甘露未足爲祥且予本不好祥瑞况非聖人安敢當之且以近年之事言之建文之末騶虞出今皇帝率百萬之衆深入不毛而麟乃見

今甘露降於咸定之間宜致一方之安乃何有野人之警乎宜速令中外勿賀略下

十四年十一月

○庚申骨看兀狄哈等來獻土物

十四年十二月

甲申丙戌○骨看兀狄哈指揮千戶等四人及兀良哈千戶四人等來獻土物

癸巳○兀良哈指揮千戶等來獻土物

○己亥兀良哈千戶等十二人來獻土物

太宗實錄 卷二十九

十五年正月

○壬子兀良哈千戶等十四人來獻土物

〔參〕○乙卯引見議政府及六曹議城藥山仍置酒上問吏曹參議許稠以相視城子之狀稠對以加得可築城者數處對未稱旨上曰卿之行不但覓〔餉力〕可城之處宜相地勢夷險人口衆寡糧〔餉力〕多少以為可守於經久矣略下

丁卯○上護軍金月下子富請留居于京許之富居毛憐衛受中朝千戶來覲其父仍請留上命議政府議之河崙李稷曰富雖受命中國曾無職事為親願留從其請可也儻朝廷命召以實對之何害南在曰我國至誠事大而留其受命者非義也上從崙等議

十五年二月

〔參〕戊戌○城藥山遣大護軍田興往觀築城之狀
十五年三月

己亥朔○永吉道都巡問使李原報易俗事宜啓曰各官散在向化人婚嫁不忌異姓四五寸甚至兄亡取嫂悖傷倫理乞自今一切禁斷以變汙俗如有違者依律坐罪從之

壬寅○檢校議政府參贊楔眉壽卒眉壽字天用大元高昌人崇文監丞伯僚遜之子也母趙氏性嚴教之有法歲丙辰年十八中第歷仕中外永樂癸未以工曹典書賈朝廷易換馬籍赴京奏免數內欠少馬二十二匹丁亥以判漢城府事奉表赴京賀甘露醴泉仍奏免起取失加所管察罕失刺不花十二戶人口時適皇后崩逝告稟禮部以衰經入哭帝稱其秉禮之邦異於他蕃深加嘆賞錫與尤厚
〔參〕癸亥—〔乙丑〕○〔上略〕以成達生爲右軍摠制鏡城兵馬節制使兼判鏡城郡

事辛悅右軍同知摠制朔州道兵馬節制使兼判朔州都護府事以摠制兼藩鎮自此始

十五年五月

〔參〕丁巳○移配廉致庸於海珍郡上命義禁府曰致庸今流鏡城恐其逃入上國造言生事可以移置

十五年六月

○己巳遣司譯院判官姜庾卿管押逃軍朴蒙舍等二十三名赴遼東承文院進遼東移咨及安印知申事柳思訥覺其咨中日月錯誤乃下知事尹淮副校理鄭麟趾于義禁府仍傳旨曰自今事大文書安印之時并備空押安印以爲恒式

辛巳○遣司譯院判官朴茂押送逃軍金南吉等六名于遼東

太宗實錄 卷三十

十五年七月

○戊午通事姜庚卿回自遼東啓曰七月初四日倭賊入旅順口盡收天妃娘娘殿寶物殺傷二萬餘人擄掠一百五十餘人盡焚登州戰艦而歸上命崔閑傳教承政院曰倭寇中國數矣而今也爲甚帝若怒而欲征之則必有助征之命將若之何且我國交通日本倭使絡繹帝若知之則必歸咎我國亦將如之何柳思訥對曰誠可慮也

十五年九月

辛亥（癸丑）○禁義州人買賣禁物六曹上言興利人所買賣禁物敬差官與其道監司首領官考察收取從之

乙卯（戊午）○遣司直閔光美管押逃來賊人金良白等二名還遼

東

十五年十月

庚辰○宗貞茂使送人及兀良哈千戶等來獻土物

丁亥○帝賜我銅人圖千秋使吳眞回自京師（中）眞啓曰韃靼等在

開平府欄截野人朝獻之路帝命征之韃靼乞降進馬三千以謝（下）

十五年十一月

己亥○骨看兀狄哈百戶這容介請留侍衛從之

甲辰（丙午）○初置咸州收判官永興道敬差官判軍資監事李迹陳便宜四條下六曹議得（中）一青州土田一萬餘結居民一千餘戶

而彼賊來往要衝之地初建府官之時不相地而設非人民聚居之地且有水災之危乞差相地之人擇地移排造築城郭以備邊境以厚民生右條相地移排邑城造築便否令都巡問使都節制使一同

親到體驗亦訪其邑人民啓聞何如一永興府乃一道都巡問使本營而號令之出入兵馬之聚會處也彼土客人往來宜嚴軍機尊瞻視是軍國之所當先也茲者邑無城郭館宇凋殘民居蕭索殊無備邊之義乞築邑城儲糧餉設器械嚴軍威一遵遼東之法制右條仍舊何如一鏡城防禦勞軍之弊不可不慮一有兀良哈之輩因求所欲來動浮言則道內自青州以北兵馬盡數赴防八九日程途往來之勞霜雪之中留防之苦且有掌兵之官田獵之弊人甚苦之乞自今如有來說者鏡城節制使以常時所掌鏡城兵馬三百與道內相遙留防二百守城待變乃待其事發告于都節制使而都節制使領青州以北兵馬而赴之猶未晚也彼賊之衆勢難當之則鏡城兵馬堅壁不出以待吉州之救兵可也如其可當出擊之亦可也何以一人之浮言而動數百里之兵以勞軍乎右條陳言內事理允當今後

以中間雜人無根浮說除給馬傳報若彼賊來侵則令鏡城郡兵馬及赴防軍馬依陳言彼強則堅壁不出馳報都節制使以待救兵彼弱則量力出擊臨機處置其郡兵馬亦令常時分番守城有事則合番應變何如命依六曹擬議施行

十五年十二月

〔參〕辛未○吉州永興城告成

乙酉○兀狄哈千戶汝及甫容我來獻土物

太宗實錄 卷三十一

十六年五月

癸卯○以戶曹啓除各司點心仍令吏曹憲府姑停各司官吏卯仕酉罷之考戶曹又啓明年不可不慮請除兀狄哈兀良哈倭人回回等人受祿而有居室者之月料以省費從之

十六年六月

戊寅○遣知司譯院事鄭喬管押唐人李名等十八名赴遼東被倭擄掠逃來者也

太宗實錄 卷三十一

十六年七月

甲午○遣承文院校理曹崇德于平安道推刷上國流移人遣還遼東

十六年十一月

庚子(乙巳)○議政府六曹請金原哲及青原君沈淙之罪原哲告尹子當爲吉州察理使時請兵野人謀叛俱下義禁府覈實原哲以誣告反坐決杖一百配濟州官奴

太宗實錄 卷三十三

十七年正月

○癸丑兀狄哈兀良哈等來獻土物

十七年二月

丁卯（己巳）遣前判司譯院事楔耐如京師耐賈被擄逃來唐人林新貴倪觀音保等押送遼東咨文及赴京火者金奇親喪禮部咨文以行

〔參〕○壬申命改築石城于龍城前此木柵也

十七年三月

辛卯（乙未）○命斬宗秀宗之宗猷五方等籍沒家產〔中略〕宗秀之流於鏡城也不月而已與野人交結見愛如兄弟及被逮挽手而哭者

頗多其奸猾類此〔下略〕

丙辰○禮曹上承文院牒呈吏文事件〔中略〕一奉使赴京各起書狀通事赴遼東使臣等官但有陳奏事理宣諭聖旨禮部遼東省會及沿途聞見事件回還十日內一一開呈本院以憑參考其有違限不呈者移文憲司糾察〔利カ〕從之

十七年四月

辛未○咸吉道都巡問使進東寧衛百戶金用貴所用木牌命藏之承文院都巡問使啓曰月初六日百姓廉生進告云以田獵事到甘音洞見東寧衛百戶金用貴小旗劉案等六名于路中用貴等曰內官張童兒陳指揮奉聖旨率軍馬一千名以白頭山寺丹青事去正月十九日遼東離發彼土所何江邊來到造木寨營倉庫十二間輸入軍餼先送軍馬五百于山間其餘軍馬則留待雪消四月望時入

來因此過夏驢及農牛草地放牧事言之授我木牌而還今將木牌上送其辭曰欽差內官張信切照本職近蒙賈捧皇帝聖旨統領遼東官軍一千員名前往白頭山公幹除欽遵到來乃顏地面安下大營位劄軍馬外差委土官頭目石脫里等四員管領旗軍五百名前去弗朱江并分春江上下山場採捕等項去後今置牌面前去四外舊有打圍處所常川懸掛如有本處附近住坐朝鮮國地面高麗女真人民或在山打圍或安放郎罟等項無知恐撞遇差去官軍互相攪擾今照天下太平四海內外皆同一家慮恐中間有等不體法度小人妄生事端有傷侵害不便如遇此牌從便打圍飛放採捕安生樂業如有百姓人等自願前來拜見往來買賣者聽從交易不阻仍將鈞旨事理省諭各寨分住坐人民毋得妄行驚疑儻有遼東各衛遞年逃軍潛住山林有能悔過自行赴官出首者不問遠近年分與遺失

免本罪給與糧賞帶回著役的不虛示須至牌者右仰通知一面以女真書書之辭則同上曰張信之牌正合事理授承文院藏之毋致遺失

十七年五月

○戊子罷都摠制李都芬大司憲李潑職初都芬與潑以賀正使副如金陵時多賈布物恣行買賣潑乃身親行之張有信曰予赴京三十五六度未見如此行者禮部知其多賈私物以來出禁于市曰敢與朝鮮人買賣者有罰禮部尙書謂元閔生曰陛辭日逼買賣何如閔生曰市人不顧布物不能易換尙書笑曰布物背節以布易鈔則可以轉換矣以此取笑中國及還事發有信恨其同行揚言曰都芬潑閔生金彥容及打角從人等多賈私物恣行買賣由是國人無不知之適潑爲大司憲出官之日憲府拒而不受劾問有信彥容等有

信答曰當初發行都芬輜重一駄伴從人並一駄行到遼東忽見不知所自來物加出者凡七隻所裹之布幾至百匹潑之輜重亦同予告兩使曰今茲行也進獻之物甚少而私賣物貨大多無乃不可乎不如沿路做賣兩使不聽至于京師市人傳言今朝鮮之人進獻之物小而私賣之貨多慎莫與朝鮮人易布後市人持鈔易布者甚多人云自官出鈔分與市人買布官收然亦未知其實也其從行者若閱生吳義彥容尙傳崔敬渭等所賣之物則雖未得詳知其數然多者至百匹少者亦不下四五十匹唯書狀官金沱之布十餘匹而已

略下

○癸卯禁平安道都巡問使贈赴京使臣雜物唯小刀子阿多介沙羅遜毛冠分套耳掩南羅介等勿禁憲府啓當赴京使臣行次遣監察一員于義州搜檢私賣物色其數外之物收取永爲恒式戶曹啓

赴京使臣每行次平安道義州等處軍人護送遼東之時每一名苧麻布中三匹式賣持入去其餘物色一禁從之

乙卯○姜淮仲報云五月二十三日鏡城出來摠旗修阿里答董不花等二十名言內使張信賈陪聖旨丙申十一月十四日到遼東率軍馬一千五百名正月十九日離發三月二十九日到羅延置木柵造倉庫輸入糧料後擔來軍人隨即還送千戶石脫里率軍人五百農牛一百六十隻亦於羅延等地農作張信又率兵馬一千四月十七日離發二十八日到南羅耳斫材木令曰毋令近地接兀良哈及朝鮮人等驚動又欲以元朝時松骨鷹子所獲處吉州阿看吾甫伊西之委等地沙所坐基趾看審爲意乃率南羅耳接千戶羅吾阿多毛等二人指路而來事傳通然西之委等處鏡城初面二三日程途不宜出送且阿看等處民多居生以在前松骨捉得事未聞爲對

○鏡城兵馬使黃象所報聲息一童不花等自中言說自遼東至南羅耳道路極險糧料擔持軍一萬八千名往返甚艱乃使軍人二百伐木開路然後出來一羅延農事只要牛飼來年二月間寺社畢造後乃還一南羅耳等處伐木則必雷震必以鉅（鉅）無聲而取故營造稽遲一造寺後以達達僧人及近處有善心僧人看直事說了一所持馬匹屢死欲以絹及木綿買馬對以牛馬放賣本國所禁一內使張信云朝鮮國王至誠事大於近地來守者豈不送酒問慰乎上命議政府六曹同議以聞左議政朴嘗以爲人臣無外交之義張內官無聖旨而入我境內必不爲之令鏡城兵馬使舉大義以喻今來鏡城人等而且告云吉州自古人居稠密松骨捉得處本無彼若欲聞于國家然後乃入都巡問使似若自爲之辭答曰雖聞于國家無聖旨故不納焉厚慰以送皆從嘗計乃命李原李春生趙末生徐選將此

意回書于姜淮仲黃象其書略曰吉州阿看吾甫伊西之委等地本無鷹子所捉沙所坐之處況侈阿里荅等既無聖旨雖報於國必不許入之事傳說而慙懃慰送勿令彼人知得傳報之意

十七年閏五月

○丙辰朔命僉知司譯院事張若壽押送被倭擄唐人金亞侵等四名于遼東

己未○咸吉道都巡問使姜淮仲上書書略曰（略中）厥後淮仲上啓本云甲山郡事張蘊使閩延鎮撫李澤率軍人五六名送于乍遷木寨臣使金慮遐問其故蘊領軍馬三十餘名屯于東良北亏羅亏草地（略中）上曰比蘊來京推鞠以聞

甲子○唐人押送官楔耐回自北京（略中）耐又啓曰我國僧人潛往遼東遼東執縛聞奏禮部郎中罵僧曰你雖曰遊方必在你國犯罪逃

來朝鮮被倭唐人悉送朝廷此僧奏當還送明日乃奏帝曰姑置於寺

〔參〕丙寅○以朴矩爲江界兵馬都節制使兼判江界都護府事〔下略〕

丙寅○賀聖節使鄭矩回自北京矩啓曰護送軍所賣布物定數而
他物皆禁人人缺望曰使臣有故而久留則農月或留至一朔加以
禁其興利此尤爲失心也請加其數以慰民望上曰因前數布十匹
人蓼五斤笠〔帽力〕等毋禁金銀馬匹堅禁戶曹判書鄭易曰十匹大過
雖五匹人人不得准數賣去人蓼三斤亦可知申事趙末生同副代
言河演等曰布數大過乞依前數上曰令戶曹量定以聞

〔參〕○癸酉以李之實爲咸吉道兵馬都節制使朴礎義州牧使

癸酉○命遼東出使人私賣去物數一依赴京使臣行次通事押物
例

十七年六月

○丁亥遣俞興俊押送唐人周亞靖等五名于遼東

戊子〔庚寅〕○平安道都巡問使報唐人至閩延等處請逃軍小宋
等命尹向及徐選等傳旨曰雖被倭虜唐人逃來本國隨即入送儻
小宋逃入我疆必當窮推解送然未有聖旨豈肯許爾入境可將此
意移閩延郡卽作知郡守之言懇懇說與唐人

○癸丑朝廷內史黃儼海壽至義州平安道都巡問使報黃海兩天
使以其遼東護送軍所持物色買賣遲緩之故憤怒卽令節制使領
軍前導自率遼東軍官叟于山野駐馬于山下李兀寶家招判官曰
前此民間牛馬散在寨里今不如古必是藏隱也還館語牧使朴礎
曰汝是秀才乎在前天使往來守令無不見辱今則不然何其買賣
之遲緩乎吾之發行遲速在於買賣畢否耳海壽扶〔下略〕通事盧卜龍而

怒謂牧使曰前此護送軍買賣之時牛馬爲先至於雜物無不許賣也今牧使不顧前規而禁止吾將白於殿下矣且牧使榜文內只錄人蔘麤布許賣而不及牛馬誠爲不當亦將白於殿下遂取榜文而藏之礎乃告曰牛馬生產則火印成藉(籍力)非守令所得擅賣也據理以荅怒猶未解黃儼則雖不現說下馬於寨里令其步從人等搜探牛馬於夜巡等處而未得也

太宗實錄 卷三十四

十七年七月

○己卯通事崔雲回自北京啓曰(略中)又會同館裏見千戶金聲告予曰白頭山下陳景張內史修造寺社捉貂皮土豹松骨鷹進去說了金聲又曰如今奉勅書以逃軍招安事後門外數多軍人率去將有望賑濟我到其處則必使送一人於國王前此意轉達金聲又曰前此我以招安事後門外歸來帝曰朝鮮國王不唯其土逃歸人至於他處被擄逃來人無一不送國王至誠其不善乎

癸未○欽問起居使刑曹判書權軫回自北京獻桂皮二斤麻黃五斤甸皮四領斜皮四領軫啓曰臣赴京時從者衣服等物過多臣悉搜還遼東等處人民曰朝鮮使臣之行負重故難堪轉輸之苦皇親

之行車子之多至於七八上曰卿言是矣憲司雖有故諫院亦在且刑曹推核亦可也

十七年八月

丙戌（戊子）○咸吉道兵馬都節制使李之實獻瑪瑙石十六斗燧石一得於骨看兀狄哈所居之處者也命下尙衣院

〔參〕丙戌（戊子）○上如大平館餞使臣儼使元閔生啓曰予將罽綿布九百九十九匹置于義州欲以此換載紙之馬予若據給則雖可換易然恐州郡守令得罪置之而來老人向殿下之心殿下向老人之心何可量乎每馬一匹綿布五匹時直也予則每馬一匹必以二十五匹爲直也上欲不聽俄而傳旨曰此馬不過四十四匹若不聽此人之言則必銜之矣明言其勢難之由曰自鴨綠江至江界境連野人其戍邊者不可一日無馬且兩國非有聖旨不可私與私受又其界馬且不產居民皆買得於平壤以南

若於平壤民間易換斯可閔生悉以告儼儼喜之曰此後儼老人更到此不求一根毛予若虛言證有皇天上乃命兵曹易換平壤府民間四十四匹以給

〔參〕乙未○囚知端川郡事金慮遐于義禁府初慮遐受姜淮仲差遣按問張蘊所犯慮遐迎淮仲意羅織蘊罪報曰蘊領兵彼土入歸不來至是問蘊則蘊曰以境內禾穀形止及雜事行審事附近地面暫出慮遐不待吾行而還歸妄報以聚兵不下於是命囚慮遐對正慮遐夜逃乃囚當直都事李文幹令義禁府窮推拘執

○丙申命議政府六曹議待朝廷出來張內官便否甲山僉節制使鎮撫孟玉來告曰今月初一日東良北地面出來中國內官張信使送人陸好里大等六名距甲山四日程加舍洞口子來到語曰張大人以良馬交易及馬料青石礪覓歸事軍馬率領欲於今月晦時出來甲山郡若張大人入來許接與否何以區處命議政府六曹同議

啓曰磨遷來住張內官若牛馬交易及馬糧請乞依憑境內入來則口子把截人等當語之曰如有聖旨而且有國家之命則可以許接無聖旨而許接不可也儻或強入僉節制使使人語曰大人無聖旨而越境不可予亦無殿下之命而私相交接不可僉節制使毋現身進退但略備酒肉且將米豆各十餘斗遣可當人贈遺仍語曰是吾分裏物也若又請率來人馬糧料當應之曰國家米豆雖一斗一升爲人臣者不可擅自出入舉義答了城子不輕守護臨機應變卽命兵曹書二件一件送于平安道一件授孟玉送于咸吉道

〔參〕癸卯○以閭延屬江界差翼千戶二員兵曹啓閭延千戶等以權差不顧生理長年防禦難堪其苦乞以此郡屬江界道中翼千戶二員差下何如從之

○乙巳遣大護軍池含于咸吉道傳旨都安撫使李之實曰龍城城

子造築已赴役則今秋畢築若不赴役則都安撫使與鏡城節制使黃象率前去地理李良一於富家狄時原間擇城子可築處以龍城城子造築軍量宜加數抄出設木柵城置慶源府蓋內官張信欲於古慶源設衛故先設木柵置府使張信聞之也

乙巳〔丁未〕○朝廷指揮李敏至鏡城節制使黃象不納象馳報云李敏等十餘人奉皇帝勅書來曰某等奉聖旨至海陽參散等處捉海青鷹子事來矣可供辦給馬入送象答曰吾守邊境豈可擅自納人乎敏等曰有聖旨敢禁入乎象又對以雖奉聖旨然無吾國王據聖旨許入之命何不堅拒敏等乃還上曰象之應對正合事理

〔參〕戊申○以忠清道水軍都萬戶金希鏡爲慶源都護府使初郭承祐爲兵馬使與野人戰敗居民流離鞠爲茂草上思欲復古難其人臺諫六曹僉曰希鏡可上曰予未知其爲人姑使就職

十七年九月

〔參〕丁巳〔己未〕○囚咸吉道都巡問使姜淮仲義禁府啓淮仲誣張蘊領兵越入彼土之罪故也

〔參〕○己未〔上略〕以曹洽爲平安道兵馬都節制使〔下略〕

〔參〕○丁卯政府六曹奉旨議慶源都護府可行事件一頃將人民約一千戶入居其地以原居流移人民刷入又於安邊以北自願人民爲先調出先運三四百戶入居其初年以國庫米穀給種子口糧俾不失農業全減租稅以待復盛一咸興以北各官鄉吏約二十戶刷出入居一將北青以北各處散居各司奴婢四五十口定爲官奴婢一定留防軍五百名以實防禦先將鏡城留防軍二百名內除出一百五十名分定赴防一千戶四人從他例教下別差百戶十屬吉州左翼一兵馬使軍官因前額七加定三人一自慶源至龍城各站依前排置站吏則因前淮陽雍丘時原富家等四站之吏青州以北各站吏量宜除出入居一兵馬使廩祿及軍官從人

糧馬料先將鏡城倉米穀題給并皆從之

〔參〕○己巳以鄭津判安東大都護府事曹備衡慶源等處兵馬使兼判慶源都護府事

庚午○大護軍池含來自咸吉道含以都巡問使柳思訥之言入傳傳旨于都節制使曰童林城基領軍馬入歸聲言來春農作且名以城子修補四方作標使軍士品從水凍則一二日拾石此虛張復立慶源之聲欲使內官張信知也

〔參〕丁丑○咸吉道都巡問使柳思訥上書書曰慶源一邑陵寢所在爲守禦者固當效死勿去歲在庚寅撫馭失道適犯其怒腥膻之俗一入其境遂使陵寢未安邊鄙空虛興言及此誠可慨念幸今天誘宸衷復建茲邑其便宜條件設施之方條列于後一慶源人物散處各官勿論軍籍現否一皆推刷勒令移置其有自願者限三年復役一慶源土地沃饒乞依六典初墾收租之法初年全除次年減半三年三分之一四年四分之一至五

年全收一公須衙祿及彼人支對之需亦不可無以鏡城之田五千餘結內一千結所出收納慶源一半以米收齊以爲供億之資一半皮穀收納以爲明年種子之備一諸道諸州公處奴婢避居北青端川吉州鏡城等地面者與淨業院奴婢居此道者一百九十五戶推刷屬于慶源又以吉州奴婢四十八口屬于慶源一彼人所須鹽醬最重願將末醬豆一百石及附近諸州鹽稅皆入慶源每年合醬以給以昭其利從之

壬午○咸吉道都巡問使柳思訥獻採金百九十兩思訥報孟哥帖木兒遣人欲率去鏡城接李大生等五人命守禦官據法禁止
十七年十月

〔參〕癸巳○命停移民慶源上曰慶源地面甚寒節制使曹備衡當與守禦軍丁三百名留守木柵待明年春和然後徙民入去可也蓋恐其道途之間或有凍死者也

戊戌〔庚子〕○兵曹上慶源節制使曹備衡合行事宜啓曰北青以

北別牌五十一慶源人物阜盛之間勿令番上許赴慶源防禦火燭火藥量宜題給遣軍器監有能放射人一名令道內人傳習且給差備人二十名糧料又兀狄哈吾都里兀良哈支給實難米布鹽醬量宜連續題給從之

十七年十二月

〔參〕丁亥〔己丑〕○是日通事崔天老回自北京啓曰帝愛重韓氏遣內官善財賚賞賜到遼東上賜天老毛衣毛冠命禮曹曰今來使臣迎接一依黃儼接待例